

東
華
續
錄

臣朱壽朋敬編

臣張毓英恭校

六月癸酉朔諭軍機大臣等茲據何璟張佩綸等電報法廷力注閩已遣人請飭援應奉制等語孤拔赴閩有欲踞地爲質之說南北洋撥解無船可撥惟閩防緊急粵浙相距較近著彭玉麟張樹聲張之洞倪文蔚劉秉璋酌撥師船前往設法援應奉制○戶部奏光緒十年四月二十五日奉 上諭詹事府代遞左中允崧國因奏度支日絀請實事求是力挽積習一摺所陳各條不爲無見著戶部核議具奏欽此欽遵由內閣鈔出到部查原奏所陳八條一曰敦節儉臣等伏維我 朝 列祖 列宗儉德相承二百餘載我 皇太后 皇上仰體 列聖詒謀躬行節儉光緒四年二月奉 懿旨裁減宮闈用款節省浮費以爲晉豫賑需九年八月奉 懿旨將中秋節應進款項五萬兩撥抵順直賑需儉德昭垂中外共仰方今庫款支絀國用未充尤當崇尚樸實力戒奢華欲濟其源自貴者始相應請 旨通飭內外大小臣工屏除浮靡共挽頹風當者國匱於豐資者量入爲出庶幾家給人足民生厚而風俗純矣一曰講農政查原奏所稱專指墾荒一節臣等查光緒四年四月御史彭世昌條陳備荒摺內重農事勸開墾兩條當

經奉 旨頒發各省妥籌辦理五年十月 臣部議覆待讀王先謙條陳墾荒摺內請 旨飭下各省督撫限三箇月將荒熟田地開單奏咨報部並妥定勸懲章程奉 旨允准通行各省六年正月 臣部奏籌餉十條摺內第一條嚴催各省墾荒並令將如何辦理開墾之處專案奏咨報部當經奉 旨令各督撫振刷精神悉心經畫等因各在案是墾荒一事 臣部迭次所議實已詳細嚴明而奉行仍在州縣督催仍在上司歷年來各省尚未一律舉辦以致地畝尚未復額應再請 旨嚴飭各督撫查照 臣部迭次議奏各案認真率屬竭力整頓悉復舊額足國裕民之本不外是矣一曰重倉儲 臣等查同治三年奉 上諭嗣後各省常平社倉責成各督撫大吏認真整頓廢者復之缺者補之並通行各督撫查明據實覆奏等因欽此六年十月奉 上諭給事中夏獻綸奏設立義倉一摺著各督撫申明舊例酌議章程廣設義倉實力奉行等因欽此光緒二年八月奉 上諭鮑源深奏請飭各省捐備倉穀以濟荒歉仿照江南豐備倉之法勸民遵辦地方官不問其出入以杜擾累著各督撫體察情形飭屬辦理等因欽此四年二月奉 上諭給事中崔穆之奏整頓各省倉穀一摺著各督撫飭屬將倉穀陸續買補務期足額勸諭紳民次第興舉如能著有成效並准其奏請獎勵等因欽此四年四月御史彭世昌條陳備荒摺內裕倉儲一條法更意美便於施行當經奉 旨頒發各省妥籌辦理五年七月奉 上諭御史鄭純嘏奏積穀備荒一摺

著各督撫仿照常平社倉之意飭令民捐民辦不准吏胥經手以杜擾累等因欽此五年十二月奉上諭御史章乃倉奏請飭舉行社學一摺著各督撫轉飭州縣一律興修或藉資民力或酌提公項著察度情形奏明辦理等因欽此是倉儲一事亦不啻三令五申現在惟山東舉行積穀數十萬石各省尚未一律奏報應再請 旨通飭各督撫恪遵歷年 諭旨認真率屬實力奉行儲積於平時庶荒年可以無患矣一曰修鹽政上等查上年十月議覆御史桂霖奏籌良法摺內 上諭將各省鹽務凡奏咨有案者分別逐一查詢其未經報部或有流弊之處令各督撫實力整頓認真裁除附片具奏 旨依議欽此此外如堵紉私漏減輕成本革除陋規裁減浮費嚴定考成招商認辦懸岸依限造報奏銷各節近年來歷經 上諭奏請奉 旨飭辦者亦不啻三令五申與該中允所奏大略相同應再請 旨飭令管理鹽政各督撫嚴飭運司鹽道及鹽務各員查照 上諭歷次所陳極力講求搜除積弊總期恤商裕課因地制宜庶幾力振頹綱離務自有起色矣一曰查關稅 上諭等伏查關稅一項正額盈餘均有定額同治五年九月奉 上諭將益漕委查明太平關稅務積弊一摺著由該撫派委廉能之員幫同關道管理此外各省關務均著該督撫監督等實心清釐等因欽此光緒五年二月 上諭覆御史黃元善請將關稅盈餘歸公摺內請 旨飭下各省關嗣後務宜實力稽徵按年徵足原額此外再有多餘儘收儘解六年正月 上諭奏

籌備餉需一摺第三條內通核關稅銀兩行令各省關除徵解足額外仍令就徵收實在情形按年量力
溢解其濟時艱各等因均經奏奉 諭旨欽遵行知在案至釐金一項雖非正供而自軍興以後除丁漕
鹽關外實以此爲大宗經臣部於光緒二年十一月奏綜核度支整頓財用及六年正月奏籌備餉需各
摺內行令各省督撫設法整頓力杜中飽今年三月二十六日奉 上諭各省抽收釐金迭經諭令該督
撫等據實報部力杜中飽乃近來釐局委員往往徇情濫委任用非人以致貪婪侵蝕百弊叢生殊堪痛
恨當此庫欸支絀之時自應涓滴歸公實徵實解若非認真稽察將使億萬釐金半歸私囊實屬不成事
體嗣後該督撫等務當激發天良明查暗訪設法整頓尤以責任委員爲第一要義並將該省釐局徵
收數目隨時稽核嚴杜弊端該委員等如有侵漁及擾累情事立即嚴參懲辦倘敢瞻徇情面袒護屬員
或被人參奏或別經發覺定將該督撫等嚴懲決不寬貸將此通諭知之欽此欽遵行知在案是關稅釐
金尤爲近來要務利之所在弊不勝防應請 旨飭下各省關督撫監督等懷遵前奉 諭旨實力辦理
務期涓滴歸公自有起色以重庫欸而裕餉源至原奏內稱出口稅重進口稅輕一節經臣部行查總理
各國事務衙門據稱查條約內載新定稅則並通商各款自日後兩國彼此欲再重修以十年爲限期滿
須於六箇月之前先行知照酌量更改若彼此未經先期聲明則稅課仍照前章完納復俟十年再行更

改又載進出口各稅均以價值爲率每價百兩徵稅五兩旋因各貨價減以致原定公平稅則較重擬將
舊則重訂嗣於善後條約訂明進出口稅則倘有貨物名目稅則未載又不在免稅之例者仍照值百抽
五之例徵稅等因均經奉 旨准行在案各外國徵收他國進口之貨稅多寡不等有值百抽至五六十
者中國收各外國進口之貨稅一律值百抽五當時中國不知外國情形實屬喫虧太甚但現在欲與更
改稅則須俟各國修約年分始能辦理等語是進出口稅應俟後修條約時由總理衙門酌量情形奏明
辦理現在應毋庸議一曰重庫欸查原奏所引雍正年間查出虧欠庫欸各案皆屬相符惟所稱光緒八
年五月禮親王等盤查戶部銀庫數目不符一節臣等查八年五月禮親王等盤查銀庫虧短銀七百五
十兩係指內庫而言當經奏明奉 旨著落賠補有案可稽並非戶部銀庫虧短該中允所言想係傳聞
之誤惟查庫欸關係重大理宜慎守職司應請 旨通飭各省督撫將庫監督司道府州縣等凡有庫儲
之責者皆當躬核簿書分晰欸項慎考出入嚴稽屬庫毋憚厭煩毋概任幕吏毋自謀營私毋瞻徇情
面交代必清虧缺卽參庶不致積累愈深賠補愈難矣一曰禁侵吞查原奏所引雍正年間查出侵吞各
案及近年張之洞查出買銷數價等案皆屬相符各省錢糧正供及關卡課稅竊更侵吞入己例禁本極
嚴明無如舉發者少總由各省大吏未能破除情面實力稽查應請 旨通飭各省督撫認真訪察據實

奏辦毋忽於既往毋徇庇屬員斯貪吏奸胥知所做懼積弊可稍除矣一日懲虧空查原奏內稱浙江巡撫劉秉璋奏浙省州縣徵收錢糧一節臣等查州縣虧短倉庫錢糧大千例禁近來視為具文本年劉秉璋奏杜絕州縣隱匿錢糧明定章程一摺立法極為確當臣等現擬就該撫所奏再為嚴定處分實核例限並將該撫所擬章程六條通行各省仿照遵辦應由臣等另行專摺詳細具奏請旨遵行抑臣等更有請者今時之急務貴生財尤貴理財理財之大端有治人乃有治法以上八條內外臣工迭次條奏臣部迭次籌議加以歷年諭旨誥諭嚴明至於再四而積弊猶未盡除財源猶未充裕者皆由委員屬吏不得其人敷衍因循積重難返之故耳蓋朝廷以鉅任責之大吏大吏以庶務委之屬僚如果任用皆得其人縱不必屢頒諭旨屢煩奏章亦自能仰體聖心因時整頓若任聽不肖屬僚欺飾隱蔽荒積穀則視為可緩之圖隱務關稅釐金則視為苟有之弊虧空侵吞庫款則相率隱匿不肯舉發糾參是雖臣部屢奏定章朝廷屢降嚴旨亦不過虛文故事弊何以去利何以興相應請旨嚴飭各省督撫將軍司道監督等嗣後一切委任務當慎選廉明公正之員認真辦理庶幾人存政舉不致徒託空言矣得旨如所議行○甲戌諭軍機大臣等法艦至基隆購煤劉銘傳飭封煤窰所辦甚是著傳旨嘉獎欽此俱在低處著即趕緊改築礮位是否合用尤關緊要法情回測務當布置周密勿稍大意斷絕接濟

是制敵要策各海口均當仿照辦理著卽諭令沿海各統兵大員知悉○諭前據御史屠仁守奏湖北鄧
西縣廩生余瓊芳身死一案疑竇多端顯有冤抑當派卞寶第詳加檢驗悉心覆鞫旋經卞寶第奏解調
到江西作件檢驗屍骨與原驗不符請另派件作複驗復據屠仁守奏督臣臬司迴護請另派大員查辦
當派侍郎孫毓汶烏拉布馳赴該省查辦嗣據該侍郎等先後奏陳檢驗有傷並搜獲串供信兩多件及
現訊情形迭經諭令詳細推求訊取確供以成信讞茲據該侍郎等審明定擬具奏此案鄧西縣書吏干
瑞堂因余瓊芳在局查問欠帳不服口角余瓊芳向前毆打干瑞堂將其推跌至地用拳連毆並踢傷
左後脇殞命檢驗屍骨應傷相符該犯供認不諱衆供亦均確鑿干瑞堂著照所擬絞監候歸入下屆秋
審辦理書吏王士俊於干瑞堂毆打余瓊芳輒用拳幫毆著照所擬革去書吏杖一百干必達代作詞狀
添砌妄捏復串唆教供實屬生事擾害著照所擬發極邊足四千里充軍已革鄧西縣知縣謝翼濟於人
命重案報驗鄉票不收復於實驗後捏改傷痕並呈遞親供曉曉辯輒以毫無根據之詞任意狡賴玩
視人命袒護書吏釀成蒸餒之案情節尤重著發往軍臺効力贖罪已革鄧西縣知縣彭世翰於原驗拳
踢各傷尙無錯謬惟任聽仵作囑報庫計有串會審時又復幫同拷訊非尋常疎忽可比業經革職著毋
庸議鄧陽府知府承祿竹溪縣知縣周益承審此案並不虛衷研鞫用刑拷訊致王士俊輕認重罪雖未

定案究屬草率候補知縣柳玉麟仰承瀕於屍子稟請免檢雖無抑勒情事惟輒令改具確係病死切結殊屬不合武昌府知府王庭楨寫給屍子據實呈情四字令其照續代詳亦有不合承祿局益柳玉麟仰承瀕王庭楨均著交部議處按察司黃彭年道員嚴昉覆審犯供翻異未能嚴切根究及檢有應傷復專執成案屢加詳駁殊屬拘牽黃彭年嚴昉均著交部議處署湖廣總督卞寶第於王庭楨等詳免檢並不批駁及檢出應傷又不詳究供情輒行奏提件作覆檢辦理究屬未當湖北巡撫彭祖賢於免檢詳文未經批駁亦有不合卞寶第彭祖賢著交部分別議處○諭倪文蔚奏順德縣屬被風查勘撫卹一摺廣東順德縣屬本年四月初間陡起颶風兼以暴雨傷斃居民九十餘名口房宇倒塌多間並有覆溺船隻情事暨奏殊深憫惻即著該督撫督飭地方官確切查明妥籌撫卹毋任失所○乙亥諭太常寺卿徐樹銘奏續勘子牙減河分途入海情形繪圖呈覽一摺著李鴻章畢道遠周家楨歸入徐樹銘前奏一併確實估核次第辦理圖併發○諭太常寺卿徐樹銘奏直隸清河道史克寬所挑子牙古洋新河水勢不順子牙河南岸低窪因頂托浪激民房傾陷甚多本年該道復於北岸加高而南岸並未培修致南岸各村雨後復被水災請將該道嚴議等語據奏情形實屬辦理乖方玩視民瘼史克寬著交部嚴加議處至上年扒堤釀命一案礙船員并不即勒阻反助村民開礮轟斃多命殊堪痛恨著李鴻章查取職名交部議處

以示懲儆○諭前因太常寺卿徐樹銘奏直隸獻縣城西陳家莊等村自新開橫河及堵塞古洋河後河流倒灌淹漬成災請飭妥籌保衛當令該京卿馳往該縣查勘奏辦茲據奏稱馳抵該處詳加相度擬將古洋河堵塞之處恢復深通山東北引入子牙河下游仍別潞支河以洩子牙河巨漲所有築堤建閘開河購料等事酌擬辦法請飭趕緊等語所奏查勘獻縣河務情形尙屬詳盡卽著李鴻章畢道遠周家柎按照徐樹銘所擬各節核實估計趕緊籌撥欵項妥爲辦理總期有利無害保衛閘閘用副軫念民生至意○諭潘蔚奏已故督臣沈葆楨之妻林氏乞援守城保全閭郡請附祀沈葆楨專祠並鈔錄該氏書稿呈覽一摺據稱咸豐六年賊匪竄擾江西時沈葆楨爲廣信府知府赴鄉籌餉其妻林氏因郡城危急作書乞援於已故總兵饒廷選沈葆楨旋卽回署與饒廷選同守郡城該氏躬親執炊以犒將士用是連戰皆捷郡城得全竊屬深明大義沈林氏著准其附祀沈葆楨廣信府城專祠○諭陳士杰奏黃水盛漲各州縣險工迭出設法搶堵一摺據稱前月初九等日黃水陡漲風雨交作民埝大堤節節生險迭飭各州縣搶護東阿等十一州縣均已搶護平穩惟齊東縣蕭家莊閘家莊歷城縣下游霍家溜河套閘利津南岸下游等處民埝被水漫決成口大堤內外均被衝刷照例賠修請旨交部嚴議並請將承修各員暫行革職留任留工督修等語山東黃河新築長堤甫經告竣何以民埝又被衝決雖據稱埝工未竣猝不及

防而一切堡房防勇均未布留周密究屬咎無可辭陳士杰著交部嚴加議處承修印委各員著悉城縣知縣程兆祥候補知縣汪應金署齊東縣知縣張鴻鈞候補知縣文琦均著暫行革職分別留任留工資令督修仍著陳士杰認真督飭各員設法堵築務期工程穩固永保安瀾被淹各村有無損傷人口並著確實查明妥爲撫恤毋任失所○諭內閣學士陳寶琛奏江西甯都直隸州知州韓誌章執法殃民上控京控案牘疊疊候補知府榮綬招搖納賄專善逢迎九江府知府達春布偏執昏庸顛預愜怯吉安府知府鍾珂辦理案件不能持平結怨釀患請旨嚴查撤參等語澄清吏治首在嚴飭劣員該學士在江西學政任內採訪衆論證以實事所參韓誌章等各款見開確鑿必應從嚴懲處韓誌章劣跡尤多著卽行革職與榮綬達春布鍾珂三員均交藩臬按照所奏各節分別查參陳寶琛奏參片內聲明韓誌章榮綬二員該撫未令赴任亦未派差是亦知其不堪任使何以不卽奏參現經飭令查辦倘該撫稍有瞻徇迴護定卽一併嚴懲懷之○內子諭前據張之洞奏歸化城副都統奎英阻撓公事於蒙民交涉事件偏袒徇庇各節當諭令察哈爾都統紹祺就近確查具奏茲據查明覆奏副都統奎英於山西辦理邊務尙無授意阻撓情事至私裁營聚令解戶司懲辦清丈糧地迭次行文先造底冊辦理均無錯謬惟於蒙古五十萬畝分贓一案地方官著有確據該衙門兵司尙以現有要差咨提會審該副都統失於覺察咎實難辭

副都統奎英著交部照例議處另片奏土默特蒙兵向賴游牧奏應現經編立客民戶籍報地升科數古不免失牧之憂等語卽著緩速城將軍督率土默特參領按照當年界址無論已開未開挖濠立界繪圖貼說辦理明確並著咨照山西巡撫於升科時不得令客民任意指報以清牧界而安眾民○諭張佩綸奏鎮將難期得力據實糾參一摺據稱著福建臺灣鎮總兵楊在元前於同治年間在臺灣鎮署任曾因濫委營缺侵冒營餉革職勒追嗣以銀兩照數賠繳奏結此次重至臺南軍民無不忿言並查參將楊在田七年兩次丁憂該員係其胞弟並未聲明丁憂等語臺灣地方緊要似此貪謬不肯之員豈能得力楊在元著卽行革職勒令回籍臺灣鎮總兵著何璟遴委委員署理○諭前據李鴻章奏繼格紹祺先後奏稱熱河建昌縣及多倫廳附近地方匪徒聚眾滋事迭經諭令督軍會剿嗣據該署督等奏報屢次剿匪獲勝茲據繼格奏擊散全股逆匪生擒首要各犯一摺此股匪徒由白岔竄入赤峰縣屬並分竄義漢壩底樹果官軍整隊迎擊膽敢列陣抗拒施放鎗礮官軍分路夾攻匪勢不支紛紛逃竄殄斃多名生擒逆首楊長青等訊明正法惟匪目王瑞仁率黨二百餘人逃入圍內及匪目周沅得等未獲仍著嚴飭各員弁跟蹤追捕迅將在逃餘匪悉數殄除毋留餘孽以靖地方該署督等前奏此股匪徒係宋敬思楊步瀾爲首此次訊據匪供並無其人是否屬實著確切查明認真緝辦毋任漏網○諭御史唐椿森奏河務緊

要請飭各督撫認真辦理等語河工關係地方利害宜如何實事求是妥慎修防若如所奏領款則層層剋扣承修官之幕友家丁又多染指委員防汛多未到工長官毫不加察各節種種玩視要工尙復成何事體著該督撫等嚴飭所屬各員於河工修守事宜務領工堅料實不准稍有剋扣侵蝕委員等均應常川駐工實力防範不得擅離汛所倘有前項情弊卽著從嚴參辦○丁丑廣東水師提督吳長慶卒賜卹如例○以曹克忠爲廣東水師提督○戊寅諭侍郎許應騷奏邊保人才一摺前任江西南康府知府曹秉溶著俟服闋後交吏部帶領引見江蘇候補道葉廷谷著該督撫給咨送部引見廣東候補副將黃金福著交張之洞差遣委用記名提督賴長春著發往福建船政局交何如璋差遣委用○己卯諭御史鄭嵩齡奏山東水災賑撫事宜請飭實心妥辦等語據稱向來外間辦賑州縣奉行故事假手書吏藉端歛錢私行威嚇種種弊端不堪枚舉此次山東齊東等縣民忿決口被淹各村業經諭令該撫查明撫恤著陳士杰確切查勘如有應行撫恤之處該撫務當督飭官紳實心經理不准假手吏胥致滋弊端實用副軫恤民艱至意○鄭嵩齡奏臣恭讀 諭旨命中外臣工保薦人才仰見 朝廷政在得人勸求吏治之至意臣維方今時事多艱災祲未已固在封疆大吏得人而理而其所最要者莫如州縣誠以州縣爲親民之官無論錢穀刑名是其專職卽興文教講武備弭盜賊救凶荒服不自州縣始小民之身家繫之地方

之安危亦繫之是州縣之職雖微州縣之權則甚重卽如上年江蘇三牌樓一案河南王樹汶一案本年湖北余瓊芳一案如果州縣廉明虛心研鞠不難澈底根究何至釀成巨案以至於此再近年以來浙江則有客民滋事廣西則有峒匪滋事廣東則有會匪滋事當其事機初露州縣斷不能諉爲不知果能實力實心督爲開導亦可消患於未萌至釀成事端未始非州縣之咎他如訊法殃民苛徵肥己胥役朦混則聽從之豪丁攬權則信任之種種弊端尤爲州縣之積習無省無之亦無時無之雖經迭奉諭旨命各省督撫嚴行甄別各省督撫亦隨時參劾而貪刻之員仍不能免蓋因兵燹以來仕路愈寬流品愈雜一時尙難澄澈近聞各省亦有考吏之法惟大率以文字試之不知爲吏之要在政事不在文章以此課吏恐終無補應請旨飭下各省督撫於所屬州縣課以實政有缺者自當隨時查察以政令之得失人品之邪正辦事之勤惰秉公舉劾力除瞻徇遷就之習卽無缺者亦當責令簿司排日接見詢以治民之策如有才識優長者分別存記俾派差委缺時自有把握不可視爲具文果能各州縣人人盡心民事則政教自見日興閭閻得以安固實於地方大有裨益上諭御史鄭嵩齡奏請嚴課州縣以清吏治一摺州縣爲親民之官宜如何盡心民事潔己奉公乃近來各省命盜案件地方官並不虛心研鞠以致迭釀巨案各項匪徒滋事又不能消患未萌甚至執法殃民苛徵肥己積習相沿實堪痛恨亟宜認真考察以

清吏治而重民生著各直省督撫於所屬州縣隨時課以實事分別勸懲廉秉公舉劾其候補人員並著督撫藩司勸加考課量材任使不得瞻徇遷就以期力挽頹風日臻上理○庚辰命督慶熙散管理神機營事務○辛巳 上詣 奉先殿 壽皇殿行禮○諭軍機大臣等聞圍場竄賊裹脅日多恐致滋蔓著李鴻章迅即飭屬偵探確切情形如該處兵力不敷勦辦即由防所抽撥數營前往將此股匪徒趕緊撲滅不得稍涉遲延一面即行奏聞○頒給四川羅江縣龍靖侯廟匾額○諭毓楹等奏永濟庫欠放各項甚多部款不敷支給請旨飭撥銀兩一摺該庫放款較前倍增需用孔亟著李鴻章飭令藩司由旗租項下籌撥銀一萬兩即由毓楹等派員支領以資應用至所請每年不敷銀兩應如何添撥常款之處著戶部議奏○癸未諭軍機大臣等曾國荃等遵許法國撫卹銀五十萬兩雖係爲和局速成起見然於事無補徒貽笑柄法使尙須聽國主之命中國大臣反輕自出口允許實屬不知大體陳寶琛向來遇事敢言是以特派會辦乃亦隨聲附和殊負委任均著傳旨申飭現美使願爲調處總署已電知曾國荃等爲期較緩如法使願將津約五條詳細先議曾國荃等即在滬與議否則曾國荃陳寶琛同回江甯許景澄即出洋劉麒祥回京美國公平評論數日亦必有信聞省有無弊信均著確探酌定行止○諭前因國子監司業潘衍桐奏請特開藝學一科當令大學士六部九卿會同總理各國事務衙門妥議具奏嗣據

御史方汝紹奏請特開實學科並據翰林院侍讀王邦卿奏瀝陳藝學開科流弊御史唐椿森奏曲藝不宜設科先後諭令大學士等一併妥議茲據會議具奏國家造就人材不拘一格設科取士原爲遴選實學起見卽請求轉學亦未嘗不可兼收並取正不必別立科目致涉紛歧嗣後如有精於西法之人在京著各大臣保送同文館考試在外著各該督撫收入機器局當差其無機器局省分分別咨送南北洋大臣核其學術技藝切實保薦庶於因時制宜之中仍不失實事求是之意沿行桐方汝紹所請特開藝學實學科之處均著毋庸置議○諭內閣學士徐致祥奏遵保人才等語翰林院編修鍾德祥著吏部帶領引見直隸試用道呂耀斗著天津道劉樹棠均著交軍機處存記至已革廣西西降州知州龔啟藩前因裁減累民土例既未遵飭張貼告示又復藉詞飾稟經慶裕以罔恤民艱等詞奏參革職情節較重徐致祥率行奏保殊屬非是著傳旨申飭○吳壽齡奏吏治之壞壞於現任人員者半壞於候補人員者半捐例開而仕途雜保舉濫而名器輕因之人鮮廉恥奔競成風雖以讀書明理之人亦皆誘於習尚而忘其所學之何事處處有官多之患人人有自顧之憂於是籌及津貼議停分發創立多局定有例差公費名曰調劑議者每謂因時救弊起見而不知徒事虛糜無關實濟夫設官有定制缺則廢公而候補無定章多則滋弊今者長官接見僚屬姓氏尙難盡識政事何從講求終歲無一差委觀察並無由施賢否安能

區別古所謂敬奏明試者蓋兩失之矣京員期滿酌留道府州縣試用甄別久已視爲具文從未聞有奏劾一人者非盡見好也實有無從奏劾者耳然而一經輪補則不得不委令之任有爲者才足濟艱無能者因循誤事而上虧國帑下戕民膏比比皆然至於地方之利弊民生之休戚始終並未嘗念及卽參劾相轉而天下已先受其害豈非心地先不俊偉而又未經歷練之所致哉爲今日謀非亟思變計不可擬請 旨飭下內而各部外而各省無論正途捐納勞績人員悉按缺之多寡資之先後酌留若干員總以可供差遣而其餘俱令暫行回籍比照大挑人員截留之例聽候咨取而其資俸概不扣除俾長官得以隨時接見覘其器識之深淺因事任使驗其才具之短長如有不堪造就者卽行罷斥無稍姑容如此則上無牽制之感正色率下而使人以不可干下無廢棄之虞洗心從公而持己孰不以正人材以選擇而愈出政治自蒸蒸日上其視如今之漫無覺察輪班補署瞻徇情面任意差委自蹈包荒之咎徒開倖進之門者果孰得而孰失哉且也內少閒員則廉俸可復舊制而津貼無容矣外少閒員則無人浮於事之患而公費可省矣試思數年來奏銷之案恆多浮冒外銷之欺更難核計而乃設立多局歲銷皆不下數千金天下雖大何能任若輩之剽削此有所耗卽彼有所絀始則提自閒欸繼則侵及庫儲勢必至於餉項無出而坐以待困夫冗員者固天下無業之游民也民猶乞食於鄉官則乞食於國竊謀營求弊端

百出而謂可勝其擾攘乎惟在早鑒及此除釐金洋稅爲餉源所自出核實整頓外其餘各局全行裁撤保不涸之源以滋其長留有用之款以備不虞一旦大張撻伐將帥不得以無餉擊肘督撫不至以空言疚心故臣所以思裕國用而亟亟於各局之裁欲裁各局而痛恨於多官之擾也伏願 皇太后 皇上嚴飭臣下實力奉行並請先自京員始如樞臣閣僚銘張之萬公忠體國數歷中外有年必能通籌全局力除積習輔導 聖明以成中興之郅治也 上諭御史吳壽齡奏內外候補人員請按缺酌留飭令回籍聽候咨取並裁撤各局等語該部議奏○甲申諭軍機大臣等有人奏參宣化總兵王可升各款前據李鴻章奏五月二十二等日王可升稟報克什克騰旗魚泡子地面匪徒滋事派宣化練軍馬隊前往剿辦續經奏報該練軍於閏五月初五等日出隊迎剿斃匪多名茲據所參此次股匪起事閏五月十六日經該總兵報該總兵若罔聞十九日始派隊出緝核其日期係屬錯誤至所參該總兵剋扣馬乾以致馬匹疲瘦閏五月十八日猶演戲賀壽各節是否屬實著李鴻章確查具奏○諭御史貴賢奏平糶局奸僧偷販棍徒包庇請旨飭禁一摺前因京師糧價日貴添設內城平糶三局並准順天府奏撥京倉米石以爲開辦平糶籌賑濟之用原爲嘉惠窮黎若如所奏開局以來奸販假冒攬運膽敢於官局門首裝載驢馱販運近畿村鎮竄役棍徒得贓包庇良懦貧民轉不得均沾實惠尙復成何事體著步軍統領

衙門順天府五城派員嚴查賣成局員如有私買糴米及包庇私梃立即嚴拿懲究以杜弊端另片奏倉米出城向干例禁飭查禁等語卽著步軍統領衙門嚴申門禁過有私販出城接濟回漕等弊立即嚴辦其擔負升斗出城之鄉民不得藉端苛索倘兵弁等奉行不力或有賣放勒索情事著一併嚴禁不貸○以何世華爲貴州古州鎮總兵○內戌諭軍機大臣等現在閩防日緊沿海防務亦均喫重彭玉麟素有遠略著於廣東應留防軍預備二萬人聽候調遣或就原統之營整練或招募壯勇足數悉由該尙書酌辦○諭軍機大臣等據張之洞電信請飭南北洋各派數艘帶水雷艇合力援閩若有十船於口門外尾綴勿戰待敵入內則下出於口門斷之欲犯他口亦然等語派船援閩南北洋前因兵輪缺少兼多窒礙迄未成行現閩防相持日久如果多派兵輪合成一隊作勢牽制勿與連戰兼可援應他口亦屬制敵之策著李鴻章曾國荃吳大澂陳寶琛迅速電商定議一面覆奏一面知照閩省○丁亥諭內閣學士文碩奏疆臣玩忽開寄請旨懲處一摺前據張佩綸奏遵查署總兵楊在元貪謬各款當將該署總兵革職臺灣鎮總兵員缺緊要該督率將楊在元派署殊屬疏忽何璟著交部議處○戊子以盧士杰署理安徽巡撫○曾國荃奏上年海防緊急各路徵調營勇轉輸軍械多借南洋兵輪船爲之運送當倉卒赴援之際未敢稍存拘執之心無不立時派往近接楊岳斌電信囑臣預備兵輪裝載撤回乾勇亦已允諾但陸

勇未知兵船規矩登船後不無隨意蹂躪該管駕將欲申明約束則客兵人眾易滋口實若或稍事姑容則船上器具動遭損壞固有強令拖帶軍火重船最傷兵輪機器每拖船一次即須入廠修理一次實非愛惜兵輪之道所尤忌者兵船載勇渡洋大船或載七八百人小船亦載四五百人撥攘紛紜坐立無定小遇風濤則羣情洶湧已覺惶駭萬分設若於此時在海面猝遇敵之兵船相與馳逐而我船轟擊之技便窮良以人多擁擠水兵足力竟無所施且陸勇見此危險迫切之狀益喧譁而不能自禁雖有智勇兼優之將亦皆束手無策勢必至於陸勇與兵船而俱摧查兵輪載用水兵若干名先須計算艙面尺寸以妥礮位水兵在上肩相摩而踵相接亦有止齊步伐之程凡屬撥動機括裝藥開礮擺左擺右指高指平不疾不徐崎嶇重亦有步武進止之宜重嘗考之西法兵船但司水戰不載陸兵無事則操練游歷有事則戰鬪轟擊其載運陸兵者則另製裝兵之大輪船可容二三千人並可裝載馬匹或慮敵人邀截載運陸兵之船則以水戰輪船護之以俱行即如去年法人調兵赴越南臺灣等處屢見外洋電報皆係另船載送未聞以所泊中華洋面之鐵甲兵輪等船分起載運陸兵前來者此其明證也夫以一船之造成本非數十百萬之貲財不能辦而一船之犀利又非窮年累月之操練不能精是利器固未可以輕忽視之尤未可以嘗試用之理所固然無論中外亦皆有同情耳臣屢據籌防局司道稟兵輪載勇拖船

之失算迭次陳請奏明禁止立爲定案。以前者防務未鬆各路應援亦別無所措手不得不通融辦理。今者欽奉諭旨大治水師則凡可以整飭水師之長策與夫有礙兵輪之流弊均宜據實上陳以備聖明採擇合無仰懇天恩敕下沿海各省督撫嗣後凡有兵輪船隻事操練巡游洋面專備戰守不得載勇拖船以昭慎重之處出自聖裁得旨著照所請行。卽由該督咨行沿海各省督撫查照辦理。○庚寅諭軍機大臣等彭玉麟等派營援閩力顧大局殊堪嘉尙現在滬議未就法情叵測萬一決裂必宜出奇制勝潘鼎新岑毓英務將現在關內各軍切實訓練聽候調遣彼此聯絡聲勢庶足迅赴戎機牽制敵情廣東能否別出奇兵由欽廉小路前進著彭玉麟預爲籌畫或別有制勝之地均著電奏復旨並著潘鼎新迅卽知照岑毓英一體遵辦。○諭李鴻章奏參違例預收緩徵錢糧之知縣請旨革職等語直隸署長垣縣知縣韓志超於奉旨緩徵錢糧仍復違例徵收實屬辦理荒謬顯干功令著長垣縣知縣元城縣知縣韓志超著卽行革職。○諭都察院奏直隸生員李先春等遭抱以匿災濫刑浮收重徵等語赴該衙門呈訴據稱直隸武邑縣去歲被災甚重書役勒賄該縣知縣濫責災民浮收丁糧並延擱蠲緩磨黃設立印板契紙苛派斂錢等語若如所奏各情殊干功令著李鴻章飭司確切查明照例懲辦。○辛卯諭軍機大臣等現派曾國荃在滬與法使議約該使無理要求婪索巨款萬難允許雖經美國照約出

爲調處成否尙不可知亟須豫備戰守況法船現聚閩口彼族詭計多端伺隙攻瑕均未可定該大臣等不得因有調處之說稍涉疏懈仍當堅持必戰之心勿存游移之見○壬辰諭軍機大臣等據彭玉麟電報請飭彭楚漢就近募勇助閩防飭程文炳募勇順流而下長江助他省防江鄂籌餉較易亦較速等語法人堅索巨款萬難允許本月十五日臺北基隆礮臺被其攻佔殊堪髮指閩防萬緊著穆圖善等傳知彭楚漢迅即募勇成營預籌戰守漳泉兩郡之人強悍可用宜切實訓練以資得力並著卞寶第彭祖賢傳知程文炳或選帶湖北防營或另募新勇剋日乘輪船由長江順流而下至江西會商潘霽與前調江西陸兵合力前進赴閩應援所需餉項著卞寶第等力籌撥濟並與會國茶會商撥給軍械刻下軍情緊迫務當妥速辦理毋誤事機○癸巳諭張佩綸奏參劾冗劣營員等語福建閩安協副將蔡康楫於營伍不知整頓空額甚多人其粗浮難勝將佐補用副將袁鳴盛充當張得勝營官輒敢斂錢販私蔡康楫袁鳴盛著卽行革職以肅軍律○頒給江蘇陽湖縣 白龍神廟額○乙未諭前因給事中鄒鍾經奏安徽候補道劉傳楨納賄招搖等款當經諭令孫毓汶烏拉布確查具奏茲據奏稱劉傳楨被參納賄招搖侵蝕帑項各節或查無實據或事涉曖昧無憑查究該員有參佐肆應之能無監守臨民之器等語劉傳楨被參各款雖據查無其事惟局量太小眾望未孚實屬不勝監司之任著以同知通判歸部銓選不准仍

在安徽巡迴○內申諭侍郎徐用儀奏遵保人才一摺浙江候補知府陳璠直隸候補知府陳慶滋順天涿州知州查光泰著各該督撫出具切實考語送部帶領引見○丁酉諭軍機大臣等從前設立招商局置買輪船係奏明辦理現聞售於美國李鴻章何以未經具奏殊屬非是海上轉運全恃輪船此舉自因恐爲法奪起見究竟是否出售抑暫行和給著據實奏聞並隨時酌奪情形設法收回○戊戌丁寶楨奏西藏喇嘛攘奪廓番財物爲數甚鉅恐日久拖延致釀邊衅奏請 飭派大員查辦欽奉 諭旨飭派四川候補道丁士彬前往辦理臣於奉 旨後卽催令丁士彬於四月十一日由省起程現據報稱已經行過巴塘並適接准駐藏大臣咨稱廓藏之事巴勒布商民所失財物該廓王允讓銀十餘萬兩其餘不能再少現經該委員等聲明償銀十八萬三千四百兩廓番已經遵斷了結並公同書立條約蓋用關防圖記各執完案該大臣一面具奏一面鈔稿咨會到川臣查廓番此次所失財物爲數頗鉅該國日現已允讓銀十餘萬兩俾議償銀十八萬三千四百兩於理尙順自可允准惟議定償銀十八萬三千四百之數經駐藏大臣極力設法祇能湊足銀十萬四千餘兩其餘短銀七萬餘兩據稱實難勒追奏請 天恩將不敷之款全數賞給達賴喇嘛及西藏僧俗番眾催令趕緊清還並請 飭下四川先行籌撥銀八萬兩解藏備用等情臣查藏番此次攘奪廓番商民財物數至三十餘萬行同強盜可惡實甚現經該大臣

竭力諭導廓番頗覺知感僅議假此數辦理尙爲妥協而藏番無故滋事大肆擄奪經廓番允讓之外該藏番尙不知改悔將劫奪之賊全行繳出以便湊足銀兩如數了案乃竟一味告苦行若無事是壞人者得利實無情理若蒙 天恩准令四川卽行籌撥墊解事原可行但恐以後該藏番必以渠等無端肇衅代墊有人動輒生事則無底之筭川省亦難盡堪現在此事既經辦理就緒大局所關臣自不能不稍從權宜以靖邊圉而慰 宸厪刻已飭司道等妥爲設法籌撥俟該藏委員來川卽行分起解交俾資應用然此項撥款雖經四川竭力籌畫似應由駐藏大臣嚴飭該藏番等分作三年歸還川庫不得延欠方合體制至此案雖結其當日滋事之首犯人等亦應 飭知駐藏大臣勒令該管喇嘛查明交出照例究辦庶於政體無礙且使藏番知 朝廷恩威並用或以後稍知儆懼不敢任性妄爲亦爲有益至丁士彬奉旨赴藏原因事關重大令其前往辦理今藏事既已辦結揆款已分半認還條約亦已立定蓋用關防圖記各執完案揆之此時情勢該藏已無事可辦丁士彬似可 飭令回川以省沿途需費儼仍須該員前往一行查看俾昭周密之處均候 聖裁飭知到川臣卽恭錄知照丁士彬欽遵辦理 上諭軍機大臣等覽奏均悉所辦甚是與前次寄諭正相脗合此案業經辦結丁士彬卽著毋庸前往○已亥諭軍機大臣等據會國荃電送巴德諾照會無理已甚不必再議惟有一意主戰著會國荃陳寶琛卽回江甯辦

防許景澄同往助理劉麒祥隨同辦事劉連捷回江甯由曾國荃等調遣吳淞口等處防務責成李成謀李朝斌分別籌辦章合才留上海會同邵友濂撫民心加意彈壓保護各國商民勿稍大意美國調處現已照會婉謝毋庸再有游移除職守機宜另有電旨外該督等卽遵諭行王德榜一軍飭令仍留廣西○諭軍機大臣等法人狡橫無理已甚現惟一意主戰著岑毓英飭令劉永福先行進兵迅圖規復北圻岑毓英潘鼎新關內各軍陸續進發○諭朕奉 慈禧端佑康頤昭豫莊誠皇太后懿旨醇親王面奏左宗棠所部易玉林喻先知兩軍迄無來京確信畿東防務緊要擬由神機營遴派馬步練軍三千人並由巡捕五營練軍內選派二千人一切軍火豫備妥協擬請以都統晉慶爲總統前鋒統領托倫布爲幫辦總統分防畿東以備不虞左宗棠所部既未來京擬由直隸防軍內酌抽協同京兵分段固守晉慶與淮軍相處最久如與合隊必能相助爲理擬令其先行赴津與李鴻章面商一切卽由該前大學士與該都統聯銜奏准再由神機營奏明將派出各隊分起赴防等語均著照所議辦理○庚子 上諭 大高殿壽皇殿行禮○萬壽聖節祭 太廟後殿遣魁斌代行禮○諭軍機大臣等法人肆行狂橫恣意要求業將其無理各節照會各國旋因美國出爲評論而該國又復不允現已婉謝美國並令曾國荃等回省籌辦防務法使似此驕悍勢不能不以兵戎相見著沿江沿海將軍督撫統兵大臣極力籌防嚴行戒

備不日即當明降諭旨聲罪致討目前法人如有蠢動即行攻擊毋稍顧忌法兵登岸應如何出奇設伏以期必勝並如何懸賞激勵使軍士奮勇之處均著便宜行事不爲遙制○諭軍機大臣等據張佩綸電稱閩不足非陸軍請止客軍以省帑力具見斟酌已諭江西湖北湖南各軍停撥著張佩綸就現有陸軍實力布置以專責成穩圖營等並著會商妥辦現在戰事已停法艦在內者應設法阻其出口其未進口者不准再入至該督等所報省臺連屏英美一節務當認真彈壓勿滋事端並先將法人失和緣山徧告各國○辛丑諭曾國荃奏贛榆縣漁網分局委員江涵秀縱勇滋事追經喊控到局輒懲旁人將附貢生董雲典違例刑責監生董雲琪等控縣驗明傷痕屬實由縣移令交出滋事勇丁復敢始終庇護延不交案經委員會同海州提藩明確請旨革職究辦等語江蘇候補知縣江涵秀於勇丁滋事一案事前既不能約束事後復一味偏護並將無干之附貢生董雲典擅行刑責實屬任性妄爲而應從嚴懲辦江涵秀著即行革職勒令交出首先滋事勇丁歸案究辦以肅軍律○諭軍機大臣等吳大澂奏請飭南北洋添募勇營一摺著李鴻章曾國荃查照吳大澂所奏悉心酌度據實具奏如須添募並著駁明餉需奏請飭撥○壬寅 上諭 太廟行禮○李鴻章奏直接總理衙門密電六月二十五日奉 旨從前設立招商局置買輪船係奏明辦理現聞售於美國李鴻章何以未經具奏殊屬非是海上轉運全恃輪船此舉

自因恐爲法奪起見究竟是否出售抑暫行租給著據實奏聞並隨時酌奪情形設法收回欽此伏讀之下悚惕莫名臣查招商輪船局本仿西國公司之意雖賴官爲扶助一切張弛緩急事宜皆由商董經營至與外人交涉權變之處官法所不能繩者尙可援西例以相維持自本年閏五月間法酋統率兵艦來華恫喝肆擾海疆不靖局勢日非華商輪船二十餘艘駛行洋面日有戒心法人徧布謠言遇船劫奪船貨成本太重懼遭不測之險南北商旅咸以搭載局船爲戒彼蓋視招商局輪船與船政煤礦同深覬覦者也若轉運官物兵械等件既無鐵艦護持必爲敵船阻截即使賒借他國之旗斷難冒險行駛若將船隻避泊口內局董唐廷樞又稱久停則船身機器必致損傷一切養船經費商力亦不能空賠於是滬上紳商私相籌議外洋商務皆憑律師主持遂密邀招商局素僱之英國公正律師担文細查各國律例成案凡本國商船改換他國旗幟須在兩國未開衅以前黑海之戰俄商皆懸德美旗號有二艘換旗於戰事三日前遂爲法人所奪復有二艘易旗於戰前賄立售回之據亦爲英國所奪布法之戰兩國商船多售與他國易旗駛行事後仍復原裝若暫行租賃則非實在轉售他國必不能保護此萬國通行之公例也先是唐廷樞在滬議交英商怡和行換旗代辦担文則謂英律煩苛難辦美律簡易易從美與中國交情較厚應換美旗爲妥適有美國旗昌行主願將招商局產悉照原值價銀五百二十五萬兩統歸該行

認傳該行以銀票如數抵給他日事定將銀票給還收回船棧權操自我仍可改換華旗道員馬建忠素習洋文熟諳公法前委赴滬會查招商局務該員就近與担文及旗昌反觀商論担文力保中法事定可以原價收回旗昌亦誓言決不失信故於價值亦不計較馬建忠偵知法事巨測遂毅然決然獨肩其責因與眾商定議訂立合同將各船棧暫交旗昌代為經理換用美國旗幟照常行駛兩面所押契據銀行期票與收票按照西國律例均交律師担文收執日後藉以為憑是戰前商船換旗出售為各國常有之事中國雖屬創見而眾商為時勢所迫亦屬萬不得已至將來收回關稅馬建忠惟担文是問眾商惟馬建忠是問節節制斷不能容稍有反觀也當法使議約未成之際軍書旁午臣雖知商船暫換美旗而未悉其詳是以未遽入告且此等事件華商與洋商交涉彼此全憑信義律師既援西例擔保而官長未便主議值外侮橫加商情惶迫數千人身家關係而官無法以保護之更無力以賠償之商人皆設法保全成本官尤未便抑勒好在各省公款八十餘萬商本四百數十萬皆有著落事竣可以操縱自如但冀法約早定船棧照議歸還中國商務復興更無嘆所之憂惟聞法人四處偵探總疑商局輪船並非實售與美尚思援西例以乘間攫奪俾為軍用美國官商亦惴惴相與隱諱竭力保護此中機括尙求聖明默鑒而曲原之得 旨俟事定後務當即行收回

東華續錄

光緒六十三

臣朱壽朋敬編

臣張毓英恭校

秋七月癸卯朔時享 太廟遣隆勳恭代行禮○法國使臣謝滿祿下旗出京○電 諭李鴻章著李鳳

苞連卽選僱德兵官五十人赴天津由李鴻章調遣酌用川資等項在出使經費項下支給到津後每人薪俸若干由李鴻章酌定前購兩鐵艦需用孔亟著李鳳苞設法於德國妥商趕緊駕駛來華毋再延宕

○電 諭李鴻章閩需洋礮甚亟著連購德國大礮十尊次礮二十尊解閩應用○岑毓英張凱嵩奏滇

省地方五金並產向辦礦務富商樂於從事貧民藉以謀生軍興以來商力民力均不如前日形頽廢臣

毓英於同治十三年內奏請試辦上年續請招商集股與官本相輔而行廣行開採光緒十年閏五月初

二日欽奉 諭旨訓勉責成飭將近來採辦情形據實具奏所有籌辦大略經臣凱嵩會摺覆陳並一面

恭錄行知藩司暨礦務總局委員查辦去後茲據署藩司李德栽詳稱本省銅務自定章禁革使費預備

底本後紳民有利則趨招徠漸廣如迤東屬之湯丹茂苑等六正廠及十一子廠係委紳參將牟正昌游

擊楊好謀蔣自萬貢生李恆芳等分認承辦迤西屬之回龍得寶等八正廠及九小廠係委紳提督楊建

勦副將熊明知州陸樹渠等分認承辦楚雄永北等廠係知府陳燦同知姜瑞鴻督商開辦雪武屬之萬寶雙龍等廠係紳士邵文藻王子猷分認承辦現復示諭紳民如有訪出新情無礙虛墓者准其報官請領開山牌票任聽開採勢將接踵而來此紳廠已有成效之情形也又據礦局委員補用知府金楙績等稟稱上年奏委招集商本因漁準倒閉時日稍稽成議在先仍各照原稟措辦查廣西候補知府張家齊候選通判關相青原認招股一百萬兩承辦永昌順甯兩府礦務通判張長曜認招股六十萬兩承辦臨安開化曲靖三府礦務江蘇道員胡家楨認招股一百萬兩知府卓維芳認招股十五萬兩通判王熾認赴川招股二十萬兩現經分催各將未解股銀源源寄前以便廣行開採卓維芳所購機器現已運到東川銅廠應用至蒙自縣前舊錫廠向係本省爐戶採辦比歲滯銷金楙績於招商項下籌本發給俾得努力開煮其餘金銀鉛鐵亦即次第開採等情此商股已有成議之情形也除將詳稟分別批飭務照指陳各節認真督率實力經營以期日起有功外臣等伏查礦務為天地自然之利運京歲有定額抽課例有常經現在經理得人勢不難蒸蒸日上策之礦苗豐旺資本充豐砂丁僱用本省之民益以川黔之眾十數萬人隨時可以招集不惟有關國計實亦有益民生臣等職任封圻分所應為責無旁貸惟有因勢而利導鼓舞商情現辦之區不准他人爭佔未開之礦聽由公舉承商庶幾紳富聞風通力合作百廢俱興

藉可仰副 朝廷利用厚生之至意得 有覽奏已悉辦理尙屬妥洽仍著飭屬認真開辦以興地利而裕餉源該部知道○甲辰諭軍機大臣等鮑超奏傷病尙須調攝兵力不敷調遣一摺該提督傷病尙未大愈覽奏殊殷厪念卽著加意調治以期早日就痊據稱四川五營不敷調遣擬招集舊部將士等語前月已有旨諭令岑毓英督飭各營陸續出關進規越南北圻必須有繼進之師以厚兵力卽著鮑超會商丁寶楨酌量調派舊部將領迅速招募勇營期於敷用所需餉項卽由該督籌撥務當源源接濟毋任缺乏將此由六百里諭令知之○諭軍機大臣等雲南防軍前有旨飭令撤回關內原係查照天津所議簡明條約辦理現在局勢未定防務仍屬緊要該督現已移軍白馬關卽著扼紮嚴防認真訓練以期緩急足恃所調各營到後亦在關內擇地駐紮不准輕進劉永福一軍仍著接濟糧餉軍火覲磨弗絕能否率部來歸並遵照五月二十五日詢問諭旨迅速覆奏○諭軍機大臣等彭玉麟等派營援閩力顧大局殊堪嘉尙現在滬議未定法情巨測萬一決裂必宜出奇制勝潘鼎新岑毓英務將現駐關內各軍切實訓練曉候調遣彼此聯絡聲勢庶足迅赴事機牽制敵勢○諭劉銘傳奏臺北基隆礮臺爲敵攻陷我軍復踏毀敵營獲勝情形一摺法國兵船駛至臺北基隆口岸於六月十五日迭開巨礮將該處礮臺擊毀十六日法兵上岸直撲營壘經劉銘傳及總兵曹志忠等督軍迎擊獲勝敵兵潰敗劉銘傳調度有方深堪

嘉尙著交部從優議敘尤爲出力之記名提督福建福寧鎮總兵曹志忠著賞穿黃馬褂提督高元蘇
得勝均著遇有海疆總兵缺出卽行簡放章高元並賞換年昌阿巴圖魯名號蘇得勝並賞換西林巴圖
魯名號副將王三星著以總兵記名簡放並賞給額騰依巴圖魯名號已革游擊鄧長安著開復原官其
餘立功將士及出力文武員弁准其擇尤彙請獎勵欽奉 慈禧端佑康頤昭豫莊誠皇太后懿旨著於
內帑節省項下發去銀三千兩賞給此次出力兵勇著劉銘傳查明尤爲奮勇者傳旨賞給欽此至基隆
礮臺前據劉銘傳奏修築未能合法本不足恃此次失事員弁著免其置議嗣後倘有守禦不力以致挫
失情事定當按照軍律從嚴懲辦決不寬貸所有傷亡弁勇卽著查明請卹另片奏解運軍械辦糧轉餉
各員懇請獎勵等語基隆通判梁純夫著賞換花翎縣丞游學詩著以知縣補用鹽大使錢壽益著免補
本班以知縣仍留原省歸候補班前補用游擊孫安邦著以參將補用並賞加副將銜已革道員裕庚著
准其留營効力又片奏道員朱守謨等懇請留營等語記名道朱守謨郎中羅廷玉均著准其留營効力
該部知道○乙巳諭延煦奏六月二十六日萬壽聖節行禮左宗棠秩居文職首列並不隨班叩賀據實
糾參一摺左宗棠著交部議處○寶授張之洞爲兩廣總督○命吳元炳前往山東查勘河工海防○命
錫珍廖壽恆前往山東查辦事件○戊申諭軍機大臣等據張之洞電稱奉敵以圖越爲上策現今唐景

松蘇勇出關與劉永福合力犄角轉餉項軍火接濟所辦甚是有旨令頒桂兩軍進發本日有旨賞
劉永福記名提督戴花翎令將法人侵占越地方圖恢復矣唐景崧著賞加五品卿銜卽著張之洞傳
旨令其激勵劉永福奮勇進剿餉銀軍火仍著妥籌接濟並准於粵海關酌撥餉項岑毓英潘鼎新務卽
督率所部星馳前進相機籌辦俟各軍齊抵前敵迅速奏聞再行降旨宣示張樹聲卽遵前旨酌帶兵勇
馳赴粵西關外毋稍遲延現在閩口接戰船廠被燬所有赴粵各軍均當盡力攻取宣布國威各將懋賞
張之洞卽轉電潘鼎新由該撫速咨岑毓英一體遵照○諭軍機大臣等前據鮑超奏四川僅撥五營兵
力不敷調遣擬令將部將領招募勇營當諭令會商丁寶楨酌量增募期於敷用現在福州口岸被法人
傷壞船隻焚燬船廠軍情緊急本日已明降諭旨一意主戰期於力挫兇鋒著鮑超與丁寶楨悉心會商
迅卽募勇成軍不必如原奏添募多營但期足資戰守尅日部署啟行由湖北乘輪下駛俟到江西暫行
駐紮聽候諭旨所有餉項軍火丁寶楨當力籌接濟毋任缺乏將此由六百里各諭令知之○諭軍機大
臣等道員馬建忠熟悉洋務現在總理各國事務衙門需人著李鴻章密飭卽日來京預備引見○己酉
諭越南乃我大清封貢之國二百餘年載在典冊中外咸知法人狡焉思逞肆志鯨吞先據南圻各省旋
又進據河內等處戮其民人利其土地奪其賦稅越南向本閭閻苟安私與立約並未奏聞挽回無及越

亦與有罪也是以姑予包涵不加詰問光緒八年冬間法使寶海在天津與李鴻章議約三條當飭總理各國事務衙門會商妥為法人又撤使翻覆我存寬大彼益驕貪越之山西北甯等省為我軍駐紮之地清查越匪保護屬藩與法國絕不相涉本年二月間法兵竟來撲犯防營當經降有宣示正擬派員進取力為鎮撫忽據該國總兵福祿諾先向中國議和其時該國因埃及之事岌岌可危中國明知其勢處迫退本可峻詞拒絕而仍示以大度許其行成特命李鴻章與議簡明條約五款互相畫押諒山保勝等軍應照議於定約三月後調回迭經諭飭各該防軍扼紮原處不准輕動開衅帶兵各官奉令慎謹乃該國不遵定約忽於閏五月初一初二等日以巡揚為名在諒山地方直撲防營先行開礮轟擊我軍始與接仗互有殺傷法人違背條約無端開衅傷我官兵本應以干戈從事因念訂約通好二十餘年亦不必因此盡棄前盟仍准總理各國事務衙門與在京法使往返照會情喻理曉至再至三閏五月二十四日復明降諭旨照約撤兵昭示大信所以保全和局著寶屬仁至義盡如果法人稍知禮義自當翻然改圖乃竟始終怙過飾詞抵賴橫索無名兵費恣意挾軋於六月十五日佔據臺北基隆山礮臺經劉銘傳迎剿獲勝立即擊退本月初三日何璟等甫接法領事照會開戰而法兵已自馬尼先期攻擊傷壞兵商各船礮壞船廠雖經官軍焚燬法船二隻擊壞雷船一隻並陣斃法國兵官尚未大加懲創該國專行詭計

反覆無常先敗兵端若再曲予含容何以伸公論而順人心用特揭其無理情節布告天下必曉然於法人有意廢約衅自彼開各路統兵大臣及各該督撫整軍經武備禦有年沿海各口如有法國兵輪駛入藩卽督率防軍合力攻擊悉數驅除其陸路各軍有應行進兵之處亦卽督趕速前進劉永福素抱忠憤而越南昧於知人未加拔擢該員本係中國之人卽可入爲我用著以提督記名簡放並賞戴花翎統率所部出奇制勝將法人所佔越南各城迅圖恢復凡我將士奮勇立功者破格施恩並特頒內帑獎賞退縮貽誤者立卽軍前正法朝廷於此事審慎權衡總因勦眾興師難免震驚百姓故不輕於舉發此次法人背約失信眾怒難犯不得已而用兵各省團練眾志成城定能同仇敵愾并著各省督撫督率戢守共建殊勳同膺懋賞此事係法人背盟肇衅至此外通商各國與中國訂約已久毫無嫌隙斷不可因法人之事有傷和好著沿海各督撫嚴飭地方官及各營統領將各國商民一律保護卽法國官商教民等願留內地安分守業者亦飭一律保護倘有干預軍事等情一經察出卽照公例懲治各該督撫卽臚諭軍民人等知悉倘有藉端滋擾情事則是故違詔旨妄生事端我中國兵民必不出此或有糾匪報復卽著嚴拏正法毋稍寬宥當體朝廷保全大局至意將此通諭知之○諭潘蔚奏江西浮梁等縣被水分別撫卹查辦一摺本年六月間江西浮梁縣因連朝大雨河水陡漲衝毀城牆衙署民房淹斃人口景德鎮被

水漂流人口數千民房館屋被壞者不下數千家餘如鄧陽樂平等縣田畝亦多被淹覽奏實深憫惻業經藩臬賑款項動撥積穀核實散放仍著該撫飭屬確查被災戶口迅速撥款妥爲撫卹務使實惠及民毋任一夫失所用副矜念災黎至意○奏議奏本月初三日內閣奉 上諭延煦奏六月二十六日萬壽聖節行禮左宗棠秩居文職首列並不隨班叩拜據實糾參一摺左宗棠著交部議處欽此臣初以爲糾彈失儀事所常有昨閱 發下各封奏始見延煦原摺其飾詞似軋殊屬荒謬竊思延煦有糾儀之職左宗棠有失儀之愆該尙書若照常就事論事誰曰不宜乃藉端訾毀竟沒其數十年戰陣勦勞並詆其不出進士出身甚至斥爲蔑禮不臣肆口妄陳任情顛倒此時 皇太后垂簾聽政凡在廷臣工之居心行事無不在 洞燭之中自不能爲所搖動特恐將來 親政之始諸未深悉此風一開流弊滋大臣奕襲於同治年間條陳宗人府值班新章雖蒙 俞允所請仍因措詞過當奉 旨申飭今延煦之疏較臣當日之冒昧不合似猶過之謹恭摺陳奏 上諭欽奉 慈禧端佑康頤昭豫莊誠皇太后懿旨前據延煦奏萬壽聖節行禮左宗棠並不隨班叩拜當將左宗棠交部議處茲據醇親王奕訢奏稱延煦糾參左宗棠並不就事論事飾詞傾軋藉端訾毀甚至斥爲蔑禮不臣肆意妄陳任性顛倒恐此風一開流弊滋大等語延煦著交部議處○庚戌諭軍機大臣等前據仲國荃電稱劉銘傳不願調江陰舊部到臺等語

現在法據關口臺灣益警亟須援兵劉銘傳無不願請部赴臺之理著曾國荃懷遵前旨卽飭章高元副部迅速赴臺一面傳知程文炳趕緊募數營卽日東下填紮江陰程文炳起行後著卞寶第等迅速募勇剋日成營聽候調撥閩省需餉孔亟著曾國荃迅咨藩屬無論何款先撥二十萬趕解並派輪運送米石接濟振武五營速催赴援該軍行後仍添募勇營候撥○諭翰林院侍讀學士溫紹棠奏遵保人才等語候選知府何降簡著發往福建交何璟張兆棟差遣委用○諭御史趙時熙奏濫陳豫省冊籍積弊請飭查禁一摺據稱河南各州縣每數十村莊設冊書一名管理稅務差徭其尤爲民害者一令應役總納閭村錢糧空糧無著盡向應役追比一令集首經理一鎮稅務歲納雜稅制錢五六百千近年荒歉歇業仍於集首取盈一民間出車馬供差向按田畝計派該州縣勒令折價包辦較正賦不啻數倍冊書舞弊取利南陽許州陳州一帶此風尤甚等語州縣有牧民之責凡錢糧稅徭諸事自應裁革弊端豈容信任奸胥玩視民瘼著該撫嚴行查禁將該省應役集首各名目永遠禁革軍差流差亦著明定章程不得任意勒折如再有前項情弊卽著從嚴參辦以蘇民困○曾國荃奏臣於六月初二日遵 旨赴滬與巴使辯論均經電呈總署代奏在案六月二十八早接總署電奉 旨據曾國荃電送巴德諾照會無理已甚不必再議惟有一意主戰著曾國荃陳寶琛卽回江甯辦防許景澄同往助理劉麒祥隨同辦事劉連捷回江

欽由曾國荃等調遣吳淞口等處防務黃成李成謀李朝斌分別籌辦章合才留上海會同邵友濂鎮撫
民心加意彈壓保護各國商民勿稍大意美國請處現已照會婉謝毋庸再有游移除戰守機宜另有電
旨外該督等即遵諭行王德榜一軍飭令仍留廣西欽此臣即日咨行欽遵辦理飭令章合才邵友濂保
護商民飛咨李朝斌專顧浦江以內李成謀兼顧吳淞崇明兩口力保長江門戶臣二十八夜抵吳淞口
與李成謀劉連捷曹德慶熟商布置二十九早欽奉總署電寄 諭旨此次法人肆行狂橫恣意要求業
將其無理各節照會各國旋因美國出為評論而該國又復不允現已婉謝美國並令曾國荃等回省籌
辦防務法使如此驕悍勢不能不以兵戈相見著沿江沿海將軍督撫統兵大臣極力籌防嚴行戒備不
日即當明降諭旨聲罪致討目前法人如有齟齬即行攻擊毋稍顧忌法兵登岸應如何出奇設伏以期
必勝並如何懸賞激勵使軍士奮勇之處均著便宜行事並不遙制欽此仰見 聖朝赫聲濯靈陸師水
懷臣於二十九日看寶山縣石洞口瀏河口行抵江陰與陳提張景春商量調遣以厚吳淞兵力面諭陳
提留四營策應江陰即日親率三營移駐吳淞口與李成謀聯為一氣臣三十日抵鎮江與易致中劉端
冕鍾紫雲相見該處地險可憑戰守均有把握初一日抵下關派吳隆海率大成隊限初三日到吳淞口
隨同陳提預備戰事未刻回抵江甯省城將連日口授調遣各務咨行各統將並遵 旨調劉連捷回江

甯初二日接總署電奉 旨布置均屬周密會國基久歷戎行江南地勢尤所熟悉一切戰守機宜責無旁貸著卽實力籌辦以專責成軍令最宜齊一所有將弁之優劣營伍之調度均山該署督秉公察辦不必瞻顧欽此荷蒙 聖慈優加策勵感悚莫名 臣惟有實力籌辦與會辦大臣撫臣提臣和衷共濟不敢稍存瞻顧所有一切機宜隨時奏明請 旨不敢一字欺飾以副仰副 高厚生成之恩於萬一 上諭軍機大臣等覽奏已悉布置均屬妥仍著督飭各軍嚴行防禦毋稍疏虞○壬子諭軍機大臣等戰事以解散脅從爲要越南人民被法裹脅甚多聞赴閩法兵亦多越人著何璟張兆棟岑毓英潘鼎新出示曉諭越人被脅者自拔來歸定當優待安置近來法人頗有願爲中國効力者如法人中有能斬將投誠亦卽破格錄用給以重賞並著多方曉示招徠○諭軍機大臣等法人侵擾閩疆我之礮臺兵船均不足恃前飭南北洋撥船援閩非曰恐爲被搶卽曰難敵鐵艦是該大臣等明知船不足恃豈可不思變計誘敵登岸堅壁清野沿途設伏均屬要著李鴻章會國基迅速籌議除戰船礮臺外有何必勝之策毋得臨敵慌忙徒損精銳吳淞江陰爲江海要隘現有礮臺求必能禦敵礮急宜多伏水雷以阻來船著李鴻章趕緊選派會放水雷之人攜帶水雷數十艘迅往南洋助防北洋需用水雷隨時飭局添造該署督務當不分畛域速赴戎機○癸丑諭御史韞德奏關稅勒罰苛派貽累商民一摺據稱左翼罰款任意加增

刑逼勒罰藉端訛索巧立名目並有官役赴鄉按戶苛派牲畜稅銀情事等語著文秀明白回奏○程伯
恆奏求治之道興利必思除弊防患貴在未萌其弊已形則更張尤急臣謹就見聞所及者酌舉數端
爲 皇太后 皇上瀝陳之一各省倉穀宜謀久儲也向例各省建倉積穀以備凶荒乃思患預防之至
計光緒三四年間直隸山西河南大荒各省疆臣遵 旨捐集倉穀以備不虞近年各州縣所積多者數
萬石少亦數千百設有水旱之災洵足以備緩急惟是穀愈陳則米粒愈細久積不宜昔田文鏡撫河南
時猶言之況南方省分地近卑濕粟易紅腐每年氣頭厥底所耗實多若不推陳出新勢必盡歸銷耗然
春舊秋買祇益行商出借貧民交還不易惟有平糶一法去三存七出入循環其法似較妥善相應請
旨飭下各該省督撫轉飭地方官通行此法價酌貴賤之中買限多少之數由公正紳董分購事訖將錢
交庫秋收穀賤再行補買足數有盈無虧且於青黃不接之時廣行平糶則黎富無從盤剝市儈不得居
奇所益實非淺鮮至猝遇天災民命繫於呼吸拯救難緩須臾必待詳請奉准始行賑恤竊恐緩不濟急
無裨災黎是則徒有備荒美名而無救荒實效也且倉穀捐之於民仍爲民用似非不可通融辦理嗣後
設有不虞應准地方官一面詳報情形一面開倉散放事後聲明數目歲蠲照章捐補庶幾倉可常盈穀
非虛設而窮黎受澤無涯矣一各省民墾宜勤培築也竊維土田之利半資乎水然過則爲災而防賢可

免無如愚民慮淺各惜財力所築大堤並不高厚一經水發卽難支持近年南省被水之區不一而足豈
眞水勢異常無可防範實由堤本卑薄不早修培故也夫天時難測地利可憑苟盡人工必收實效臣籍
隸江蘇之泰興縣其地三面臨江咸豐初年江水爲災經前縣令督率鄉民增築舊堤腳寬四丈二尺面
闊八尺身高一丈二尺沿江百里屹如長城自後山水暴發江湖頂衝大堤從未漫決民甚感之近年水
又爲災復經現任縣令就塌入江心之處仿其規模移內補築去年水發尤大各堤均皆牢固歲尙有秋
是知多盡一分人工卽少受一分水患其明效大驗固確有可見也水退以後大吏何嘗不以工代賑堵
築決堤無如新堤仍復卑薄舊堤不加修培以致凶荒屢告獨賑頻仍若肯未雨綢繆勤加培築又何至
下損民生上糜國帑哉夫地方官身膺民社水利農田本其專責昔江西撫臣陳宏謀疏言向例農隙
時令地方官將舊築民堤派夫修葺良以財力雖出於民督率必由於官始免阻撓之弊相應請旨飭
下各該督撫於防守圩堤由民修築者皆責成地方官每歲秋成水退親往踏勘勸民培築舊堤繼長增
高卽四面臨水沙洲亦加高培厚以期無虞至地方官任事尤必示以勸懲俾知振奮庶水患去而民生
乃益遂矣一緝私勇丁宜裁撤也查向來口岸緝私本地方文武專責軍興以後各省募勇防剿已屬權
宜之計乃口岸各商亦多招勇丁專緝私梟而地方因以多事光緒初年革員張學醇承辦淮浙各岸鹽

務倡議募勇緝私四出驅擾江北江南怨聲載道經前督臣沈葆楨訪聞裁其口岸當時快之無如勇丁未去弊累猶存雖由上憲派員帶勇而約束稍疏恣肆如故近年游擊劉高山於常州府屬帶勇緝私積怨已久去冬勇丁李得林強姦童媳劉梅氏亦經事發查參是則商人招勇緝私而其害甚鉅卽委員帶勇緝私而其害仍烈也夫勇丁性本狂悍加以統兵官縱容袒護一經釀成重案非前囑屍親卽藉口拒捕粉飾了事是以膽大妄爲無惡不作其中零星小販夾帶商船受其荼毒猶可言也至懦弱良民本非販私而亦指爲販私以肆陵虐本非食私而亦誣爲食私以遂要求甚至強劫資財辱及士類民則何辜而乃橫遭荼毒若此況勇丁分布口岸不特擾害地方亦恐有誤操防且以尋常緝私猶必藉資勇營則勇營何日可撤國計何日可紓若謂練營緝私必多竄放竊恐他處之勇久駐其地亦皆無異練營雖近年練營官兵不無較弱然以之征剿則不足以之緝私則有餘如其督率有方豈真難得其力相應請旨飭下各直省督撫嚴飭地方文武員弁水陸營汛認真巡緝嚴密稽查將各口岸緝私勇丁一律裁撤非真有大股私島由地方官稟請不得輕撥防營搜捕似於緝私安民均有裨益矣上諭御史習伯恆奏撤陳地方利弊請飭酌量變通一摺各省捐積倉穀原爲思患預防之至計惟存儲過久消耗必多借借商民亦滋流弊著各督撫妥定章程由地方公正紳董酌價平糶按時買補倘遇天災並准地方官

一面詳報一面開倉散放拯救災黎以收備荒實效各省民堤關係水利農田自應未雨綢繆議加修築
著各督撫責成地方官於舊築民堤每歲親往履勘勸民培築繼長增高並分別勸懲以期有備無患巡
緝私梟本地方文武專責近年各鹽商募勇緝私四出騷擾實爲地方之害著各該省督撫將此項勇丁
卽行裁撤其各口岸私梟卽嚴飭文武員弁水陸營汛認真巡緝嚴密稽察以靖閭閻○○國奉奏上於
光緒十年七月初五日准卹機營咨開六月二十四日總理衙門具奏遵議都統善慶請調隊伍保衛畿
輔一摺奉 旨依議欽此原奏稱善慶請調江南恪靖五營事機未定江南隊伍此時能否照撥應請
飭下曾國荃統籌全局斟酌情形詳議覆奏等因竊思畿輔附近要區關係極重理宜速撥北上藉資拱
衛惟當國氛正熾船廠已失卽江南在閩廠定造未成之二船已交價銀三分之二諒亦同燬是吳淞口
黃浦江海上江陰鎮江一帶十分戒嚴查蘇省兵力本軍前次左宗棠所調良營衛隊二營與此次善慶
所調威禮正中副中正後五營均已派屯吳淞口江陰鎮江保守要隘萬難抽調且七營大隊北上若由
水路則自六月初十起洋商輪船早已不肯裝載兵勇軍火若由陸路則江北山東直隸正值大雨時行
小河港汊處處隔水無船可渡無路可繞非六七十天所能到況法船在閩勢燄甚兇萬一回犯吳淞可
以早發夕至又據滬電探稱法調黑兵數千氣球四箇欲來騷擾各口並有先犯吳淞之謠伏思此口關

係長江五省門戶。臣等江督不得不力籌守禦。保東南財賦之區。現江南各路統領將官一聞閩廠之失。均云兵力太單。亟須添募。爲今之計。惟有仿照直隸總督李鴻章近日所籌辦法。欽遵六月二十九日寄到諭旨。具奏添募。並咨會李成謀。添各兵輪船上水勇數百人。飭令曹德慶添准勇三哨。張景春添募專管水雷淮勇一哨。惟念徒有守兵而無策應游擊之師。終非良策。臣現擬札飭劉連捷陳湜章才吳隆海等各自選派所部驍勇善戰之將。添募精壯強悍之勇十二營。各歸各軍統屬。便可留五營之餘力。爲各路之策應。而以七營分布填紮左宗棠善慶奏調七營隊伍所守之地。一俟募齊成軍。即可令恪靖七營啟程北上。馳抵通州。聽候善慶調遣。以資拱衛。約計中秋拔隊成行。九月可以抵通。惟核計前後所添水陸各勇每月約共餉需五萬兩。有奇。而南琛南瑞二船月餉尙不在內。臣理合遵旨奏請飭部就近指撥。每月餉銀五萬兩。給發金陵籌防支應局。以資周轉。而遏寇氛伏祈聖慈。迴格鴻施。俯賜訓示。俾得有所遵循。上諭軍機大臣等。覽奏均悉。所有前調恪靖七營著俟該省新軍募齊填紮要隘。卽飭起程北上。所請飭部指撥月餉銀五萬兩之處。著戶部速議具奏。○曾國荃奏前督臣左宗棠飭由泰來洋行商人福克向德國船廠定購南琛南瑞快船二號。業已先後開駛來華。經臣派員前往詣驗。機器頗覺靈捷。噸位亦尙精利。當將未付之船廠一切價銀。飭由江海關道邵友濂在於借用出使經費項

下如數找給清款惟該二船馬力均係二千八百匹較至大之開濟快船馬力加增四百匹今若仿照開濟章程僅配募一百八十三員名管油升火水手各項人等均有未敷現當防務喫緊之際船上軍務尤繁自應仿照開濟章程略為加增每船擬配官弁人等二百一十七員名月支薪糧銀三千兩有奇公費銀四百二十兩均於募齊到船之日卽在南洋海防經費項下起支據江南籌防局司道造冊詳請奏咨前來臣查該兩船馬力既比開濟較多則人力薪糧亦宜加增用兵之道無他妙巧必須先得其心而後可資其力今核所配員名銀數均係酌中定擬自可照行得 旨該衙門知道○丙辰諭前因山東民捻決口諭令該撫確切查勘如有應行賑撫之處督飭紳董實心妥辦該省連年被災本年又遭水患小民流析離居深堪軫念現在被災各處會否查明給賑陳士杰未回省垣以前著卽飭令藩司督率官紳迅速籌款將賑撫事宜趕緊辦理毋稍遲誤○以敬信爲禮部右侍郎○賜卹遭風溺斃之福建平海營師船管帶潘叶飛等○丁巳 上諭 奉先殿 壽皇殿行禮○諭前據給事中孔憲毅奏太常寺少卿張蔭桓有私行兩致上海道情事當諭令總理各國事務衙門大臣明白回奏茲據奏稱所覆上海道電信皆係公同商辦等語查閩所寄電信內尚有措詞未當除彼時閩敬銘徐用儀因病請假錫珍廖壽恆出差外奕劻福錕崑岡許庚身周德潤陳蘭彬周家楣吳廷芬張蔭桓均著交該衙門議處總理各國事

務衙門從前辦事每有不能詳慎之處嗣後該大臣等務當加意慎重不得仍蹈前轍致干重咎○諭御史劉恩溥奏請於劉銘傳張佩綸二員中簡任一人暫權閩督等語封疆大吏出自朝廷特簡豈臣下所能率請該御史所奏實屬冒昧劉恩溥著交部議處○諭御史吳响奏樞臣聲名日敗懇予矜全一摺據稱籌兵籌餉實在軍機閣敬銘專俟諭旨並不預為區畫等語前因恭親王等辦事因循不能振作有為欽奉 慈禧端佑康頤昭豫莊誠皇太后懿旨分別開去差使休致降調特簡禮親王世鐸等入直樞廷當積習之餘又值多事之際內外大臣間有游移顧忌所見未能遠大不能專責閩敬銘一人嗣後務各殫竭忠誠於一切事宜實心實力妥籌辦理和衷商榷共濟艱難不得稍有疏懈此次法人肆意要挾先開兵費中國屢予優容已屬仁至義盡現在戰局已成倘再有以賠償等詞進者即交刑部治罪總理各國事務衙門大臣辦理中外交涉事件必須體用兼備能持大體之員方足勝任周家楣吳廷芬在該衙門行走年久辦事未能合宜寬罔於洋務未能請求周德潤於應行公商事件輒單銜陳奏其為不能和衷已可概見張蔭桓屢經參奏望不至陳爾彬年力漸衰雖勝煩劇均著毋庸在總理各國事務衙門行走至閩敬銘辦事練達清操久著吳响輒以執拗剛愎過任性等語形諸奏摺實屬措詞過當吳响著傳旨申飭○諭翰林院侍讀學士良貴奏遵保人才一摺江西督糧道崑崙著交軍機處存記內繕書

房章京繼恩直隸候補道衛杰教習揀選知縣許世芳均著吏部帶領引見○諭楊昌濬奏遵旨督師前往福建請派署理漕督一摺漕運總督著孫鳳翔馳驛前往署理未到任以前著江南淮揚海道王加敏暫行護理○諭吏部奏遵議大員處分一摺禮部尚書延煦應得降三級調用處分著加恩改為革職留任仍罰俸一年○諭兵部奏降調侍衛金鳳岐詞呈控著仍山部查復恐不足折服其心請派大員查詢等語著御前大臣查明具奏○頒給科布多 城隍神匾額○己未 上詣 奉先殿 壽皇殿行禮○諭軍機大臣等李鴻章電稱藩鼎新來電越境療療正盛守易攻難岑毓英兩中須俟秋後療減乃可進兵等語前粵軍既難前進劉永福所部久居該國能耐烟療著傳知該提督趕緊督軍進取岑毓英撥給餉銀軍火務使足用迅赴戎機滇粵各營與該軍聯絡策應用壯聲援現已秋高療減迅速進發不得藉詞遷延致干重咎○曾國荃奏 上於光緒十年七月初八日亥刻接電報本日奉 旨前據曾國荃電稱劉銘傳不願調江陰舊部到臺等語現在法據閩口臺灣益警亟須援兵劉銘傳無不願舊部赴臺之理著曾國荃懍遵前旨卽飭章高元舊部迅速赴臺一面傳知程文炳趕緊募數營卽日東下填紮江陰程文炳起行後著卞寶第等迅募勁勇尅日成營聽候調撥閩省需餉孔亟著曾國荃迅咨藩署無論何款先撥二十萬趕解並派輪運送米石接濟振武五營速催赴援該軍行後仍添募勇營候撥等因欽此當

經轉電湖北卞寶第並咨江西藩欽遵辦理在案其時福建馬尾開仗船廠及輪廣各船多被沈毀閩臺岌岌可危如有可以大兵相助之處斷無不竭力撥營援應之理惟軍情瞬息千變初八日電報長門礮臺亦被攻毀法船出入無阻又據大北公司電稱孤拔已與巴使電約意圖內犯吳淞口長江各口志在盡毀我水師等語張景春銘武八營駐守江陰兩岸礮臺所謂章高元之舊部統係劉銘傳部劉銘傳五月在金陵與臣相見兩次均言不調銘武各營即奉 命督辦臺防以後所來兩廣亦云不調該軍臣在滬上將近一月正值閩臺萬緊之時臣派道員龔照璠偕英國野雉船二次密載礮位軍火多件送到基隆淡水龔照璠得劉銘傳覆信亦無調銘武四營渡臺之說此臣所以知其無此意也江陰乃長江入江之始東南數省財賦第一重緊要門戶關係五省安危設有疏虞大局何堪設想且該處現設礮位數十座江中安置水雷均係銘武各營一手經理日夜保護且與長江提督李成謀兵輪水師依倚倘或調動不惟江陰局勢渙散卽皖吳江鄂沿江兩岸人心難免驚惶似非新集之營所能擔當近日探報法人輪船入江可以早發夕至目下將有戰事何敢以駐防最久之營臨警更易生手坐失機宜臣查山吳至臺定須航海不特吳中現無兵輪可載大隊出海前月欲僱外洋商輪送臺除一野雉船外亦皆咨云不敢裝載兵勇軍火且程文炳久無信來不知何日乃可到吳卽到亦萬難遽以新集之勇扼守極要之

關臣因東南大局所在不得不披瀝上陳竊懇 聖慈鑒察 上諭軍機大臣等覽奏已悉銘武各營既難更動卽著毋庸抽調赴臺仍著督飭各軍嚴行扼守並嚴催程文炳迅速帶營東下聽候調撥○辛酉欽奉 慈禧端佑康頤昭豫莊誠皇太后懿旨前據御史吳崑奏參閣檄銘執拗剛愎等情一摺朝廷以所奏牽涉軍機大臣當令醇親王奕譞遵照面諭繕寫諭旨宣示並諭嗣後如有以賠償之說進者交刑部治罪乃該御史誤會此意本日復以軍機大臣擬有抑揚其詞恐爲議和賠償地步具摺陳奏立諭批繆迹近深文周内所奏著毋庸議○實授會國荃兩江總督兼辦理通商事務大臣○諭已革山西布政使林壽圖著賞給四品頂戴作爲福建副練大臣○諭大學士左宗棠著授爲欽差大臣督辦福建軍務福州將軍穆圖善漕運總督楊昌濬均著幫辦軍務三品卿銜翰林院侍講學士張佩綸著以會辦大臣兼署船政大臣詹事府少詹事何如璋著來京○諭軍機大臣等江南防務現經會國荃布置尙爲周密福建兵力尙單情形喫緊本日已授左宗棠爲欽差大臣督辦福建軍務楊昌濬現在招募勇營尅日起程會同該省官兵力籌備禦期於制敵決勝左宗棠著於浙江福建交界地方督兵駐紮以備策應毋庸親赴前敵福建辦防疏懈該大臣當會商穆圖善楊昌濬等實力整頓務使戰守確有可恃除前調北來七營及撥給楊昌濬恪靖四營歸左宗棠節制調遣外其餘江南防軍不得再行請調以免顧此失彼

○諭紹祺奏搜獲首要各匪並餘匪竄入蒙古地面圍剿淨盡各摺片蒙古魚泡子地方股匪滋事前經官軍會剿已將全股擊散諭令跟蹤追捕餘匪此次拿獲之朱洛四卽朱敬愚宋金藻李志典王珍瓊或係著名積匪或係隨同拒敵業經紹祺訊明正法足昭炯戒至前竄圍場餘匪是否已於蒙古地方剿除淨盡仍著李鴻章紹祺確切查明如有在逃餘匪督飭認真搜緝毋任漏網○諭著改派延煦邢世長馳驛前往山東查辦事件錫珍廖壽恆著毋庸前往○徐樹銘奏上月二十二日遵 旨令大部九卿等會議內閣恭讀 諭旨飭令籌商漕運仰見 聖朝重倉儲厚根本之至計查本年江浙兩漕業經收兌所有奉天小米等糧猶未先後到通此皆運以海船者也現因法逆橫肆海道梗阻中國斷無議和之理即使選擇凶鋒亦必續圖報復自蘇達津海道遼闊設有疏虞豈堪設想爲今之計萬不能不復河運查前漕臣吳棠試辦河運以民船載米十萬石運濟來通及今二十餘年從無貽誤惟爲數較少轉運亦易若將江浙漕糧全歸河運而陶成阜之候黃臨清州之候清本無把握即使水流驟旺亦恐船多日久難資轉運昔之建閘蓄水良法蓋愈誠可爲萬世法也自兵燹之後閘壩失修河流淤淺臨清東昌運道經行之處幾至不可通舟必須通盤籌畫大加疏濬應修閘者修治以蓄水應疏通者深濬以容水則全漕轉運無難矣至所用船隻應飭明帶廉潔委員督堅固民船比照海運章程仍核實經理不得多開名

目濫行支發以節糜費或謂海運經費較少不知海道既梗僱運他國商船裝載入津而此項運費巨款散歸外商何如散入內地商民以實 中國之爲愈也或謂僱用船隻過多勢難約束不知得人而理以寡取衆要言不煩無勞過慮或謂需船過多勢必價昂船少不知河運阻遏久矣洋輪奪其生理抑不伸必能爭相應募無虞缺少卽或偶有缺乏而各處船廠亦必陸續成造求僱斷無缺乏之理至於額設糧艘久經損壞成木過重猝難修造不得拘泥成見藉口阻撓庶小民之生計漸豐而 畿輔之倉儲並裕相應請 旨飭下戶部倉場侍郎直隸兩江督臣江蘇浙江山東撫臣漕河督臣及此秋水涸涸之時宜爲未雨綢繆之計卽使海疆無事而河運乃裕 國之常經甚於海運本一時之康濟也 上諭太常寺卿徐樹銘奏漕糧宜全歸河運請於運道經行之處疏濬河流修治閘壩并擬選僱民船照河運章程核實經理一摺著該部議奏○以高光効爲湖北漢陽鎮總兵○曾國荃奏 旨前因奉 旨飭調恪靖等七營北上兵力益單而各路增兵之請紛至迭來比飭各戰將就近添募十二營遵 旨奏請飭部每月撥給銀五萬兩以濟該新軍在案厥後迭接電法艦攻毀長門礮臺卽駛出口意在攻犯吳淞長江欲盡滅我水師並據北洋大臣來電情形十分緊急 惟惟有飛函李成謀陳湜曹德慶吳安康章合才張景春易致中等督率水陸各戰將日夜嚴備禦遑 諭旨見敵船卽轟擊如有敵兵登岸卽與拚命力戰萬

不可再落後著旋准漕臣楊昌濬電奉 命援閩欲調得力之勇四五營臣立即允諾並約程文炳一軍到日亦請 旨飭令隨同楊昌濬援閩又接北洋李鴻章轉電稱劉銘傳欲調江陰劉朝祐之勇三四營援臺臣亦立刻允許電派邵友濂不惜重價租各國商船載兵渡臺乃均以中法決裂各國守局外例不應出租爲詞臣亦無如之何然皆電覆允俟海路可通卽行撥隊援閩渡臺迭次欽奉 諭旨一意決戰閩臺兵力均單難以持久義不可以不援臣北上通州之七營爲拱衛 京畿起見迭經左宗棠等屢奏定有案似亦不可因此而減少四營臣既已允許撥出八營援閩渡臺而要隘之地不可空虛自不能不照數補足以重防守惟念招募宜先遴選能戰之將而選將必求善戰善守之人方免流弊諺云千兵易得一將難求實非虛語臣已飛電諭令陳提章合才吳隆海陳美仙等趕緊添募又面語劉連捷譚理馬融和等就近速辦均限十日半月一月之內成軍庶幾填紮奏調八營所遺各要隘以資沿江兩岸戰守之用大約中秋前後均可到防足以仰慰 聖懷得 旨知道了卽著將添募各營飭令迅速成軍以備戰守○曾國荃奏軍事之利鈍恆視餉事之盈絀爲轉移各省應協海防經費早已有名無實江南原爲財賦之區而入款雖鉅出款亦繁近年所入祇供通年常例之用一遇別有緊餉卽慮不敷周轉從前戶口繁多人民庶富尙易籌辦自兵燹後元氣未復商賈罕有積儲去冬各路錢莊紛紛倒閉銀源枯

竊兼之鹽課關稅釐金收數無一不細問閱既無可勸之捐庫儲均有立涸之勢而陸營之駐吳淞江陰者均係首當敵衝日夜戒備一切操演賞犒在在增費水師兵船亦添油艙之費修理之費增募汽火頭等二等礮手水手之費購買水雷鎗礮子彈之費防務一日不鬆餉項一日不能短缺臣現於無可如何之中奏請加收川鹽之釐藉資補苴而路途既遠設局需時尙屬緩不濟急臣前在上海面詢江海關道邵友濂關庫雖屬空虛惟出使經費項下除前次奏借銀六十萬兩撥濟船械經費外尙有餘剩存積臣擬再續借六十萬兩撥充前敵水陸各營緊餉非敢存待臨望蜀之心當此事機萬緊全賴鉅款以濟各軍之用庶幾膽氣更壯呼應較速人人思奮踴躍爭先於防務大有裨益此項借款擬俟前款清償接分三年次第籌完以江南之全力歸還兩次借款不致虛懸無著合無仰懇 天恩俯如所請俾將弁生激勸之心士卒收飽騰之效微臣幸甚大局幸甚 上諭軍機大臣等前據李鴻章奏請借撥出使經費當諭令咨商會國基通融辦理此項經費尙須留備出使之需不得全數動撥所有此次會國基奏請續借銀六十萬兩卽著與李鴻章會商酌量勻撥以資應用○壬戌以熱河圍場匪平予出力人員文桂等獎敘有差○癸亥諭翰林院侍讀學士溫紹棠奏請飭知府何降簡募勇赴閩一摺何降簡係發往福建差委之員自應前赴閩省聽候該督撫差遣委用若任其自行招募募勇尙復成何政體所請殊屬冒昧著

不准行○甲子諭軍機大臣等前令廣西至雲南安設電線現在滇粵督撫已否辦理能否由龍州徑至馬白關蓋張之洞轉電潘鼎新迅咨岑毓英立即商辦以速軍報並一面奏聞勿得遲誤○乙丑諭軍機大臣等李鴻章電稱張佩綸懇辭船政等語張佩綸應遵前旨將船政妥為籌辦不得藉詞推諉○丙寅潘鼎新奏於光緒十年四月二十八日龍州行次承准軍機大臣字寄二月十四日奉 上諭本日據徐延旭奏參督戰不力將領請將提督陳瑚綱副將党敏宣周炳林革職等語前已有旨將陳得貴党敏宣即在軍前正法陳瑚綱周炳林均著即行革職交潘鼎新查訊明確請旨辦理等因欽此又於五月初九日在越南諒山行營准兩廣督臣張樹聲咨開四月二十六日准兵部火票遞到內閣鈔出三月十七日奉 上諭前已有密諭令潘鼎新馳赴廣西鎮南關外傳旨將徐延旭革職拿問並令王德榜傳旨將黃桂蘭趙汰革職拿問等因欽此恭錄咨會到臣維時徐延旭已定於五月初十日自龍州起程陳得貴党敏宣業經遵 旨正法軍前臣均於五月初八日附片陳明在案臣到諒山即會同王德榜逐日訪查北甯距諒山二百九十里其南三十里為慈山府再十里新河橫出其前適當河內來路其東南六十餘里為芹驛關瀕六頭江上為三江口溯流而上十餘里左河入月德口經扶明扶良等社再三十里為浦球在北甯之東北距城七八里為大軍後路自山西不守以後北甯孤懸已成四面受敵之勢黃桂蘭趙

太原派左路各營扼守北寧及扶良涌球諒江等處派右路各營扼守慈山新河六頭江三江口等處惟地段太寬分防不易自上年秋冬陸續調募以及今春共添至四十餘營慈山雖當河內之衝而陸路至寧城較遠法人恃其長技以火船往來六頭江扶朗一帶游弋窺伺其時派防六頭江三江口者爲党敏宣及游擊謝洲田福志千總李應光軍功李福良李潤高岳嵩陳天宋等大小八營派防扶良者爲陳得貴及副將李極光二營派防涌球者爲陳朝綱及參將習世祥二營派駐北寧城外者爲周炳林及總兵章和禮副將黃玉賢都司李逢相尙國瑞守備賈文貴等六營派駐北寧城內者爲參將蔣大彰一營千總黃效賢兩哨派駐城南糧山者爲副將李石秀黃才貴兩營其餘各營均分布慈山桂陽新河左河等處扼要駐守二月十一日法人以大隊兵輪板艇駛過六頭江至扶良登岸撲犯防營陳得貴等堵禦敗退敵蹤逼近桂陽非章和禮李極光習世祥等拚命力敵事已先不可問至十五日法人復增添輪船悍黨由扶良直上並分犯慈山新河三江口等處水陸並進黃桂蘭趙沃調撥各營分路迎敵並親赴中路督隊戰至申時法忽留火船兩艘駛上涌球夾攻各土山礮臺開礮四擊陳朝綱周炳林等營抵敵不住因而敗潰黃桂蘭趙沃聞警轉回城邊南官先已開門逃走內外教民四起應敵於是各親兵擁護黃桂蘭趙沃向太原一路而去慈山新河各路營勇亦遂紛紛潰敗此北寧失守之實在情形也臣復飭派委

員訊取趙沃等供亦無異詞惟悉供稱辜負 天恩自請從重治罪等情除黃桂蘭業經革職身故毋庸議外臣查已革道員趙沃久駐北寧專辦防務乃一遇敵蹤大至竟不能固守待援本應從重治罪惟念其庸懦衰頹取將無法致令臨時抗調尙非統將先逃然貽誤事機咎無可免已革提督陳朝綱身充統帶駐防浦球雖因大頭江扶良已先失事勢難抵禦究係防守不力僅予革職不足蔽辜擬請將已革道員趙沃已革提督陳朝綱一併請 旨發往黑龍江充當苦差効力贖罪革職副將周炳林調派策應接戰受傷且陣亡哨官羅威志各退縮不前業經革職請免置議此外將弁臣逐一查明如隨同營敏宣疏防六頭江三江口之游擊謝洲田福志千總李應光軍功李福良李潤高岳嵩陳天宋駐防北寧守禦不力之參將蔣大彰守備賈文貴失於援應之副將李石秀黃才貴退紮新街之總兵陳德朝把總黃雲光趙福星軍功方金安黃福茂紀律不嚴之軍功覃志成千總李全忠等皆有應得之咎既經查明不敢徇隱所有謝洲田福志蔣大彰賈文貴李石秀五員均擬請 旨一併革職黃才貴陳德朝二員平日打仗尙屬奮勇均擬請 旨以都司降補其李應光李福良李潤高岳嵩陳天宋黃雲光趙福星方金安黃福茂覃志成李全忠等十一弁均卽由 臣咨部斥革內覃志成一弁所部驍撥尤甚徐延旭本擬懲辦以遠在前敵未果 臣仍當隨時察看酌量辦理至駐防北寧之李逢楨尙國瑞協防扶良之李極光駐防諒江

之督文治李定勝郭湧泉並連日打仗各受重傷其餘各營或以道遠勢孤力不能支或以市經到防紮營未定是皆不無可原可否籲懇 天恩從寬免其查辦出自 逾格鴻施從前潰敗之勇業已先後遣撤二十餘營所有遵 旨查明北甯失陷情形並將各弁分別參辦緣由理合恭摺覆陳 上諭潘鼎新奏遵查越南北甯失守情形將各將弁分別擬辦各摺片本年二月十一十五等日法兵至越南扶夏江登岸撲犯防營陳得貴等首先敗潰法兵分犯慈山新河三江口等處黃桂蘭趙沃分路迎敵趙沃和綱周炳林等營敗後黃桂蘭回城越南各官已開城逃遁黃桂蘭即往太原一路各路營勇亦潰各將弁防禦不力實堪痛恨除黃桂蘭畏罪自盡應毋庸議外已革道員趙沃已革提督陳朝綱本應軍前正法惟念北甯被陷係越官開門迎敵該革員回救不及尙有一綫可原所請發往黑龍江充當苦差之已革道員趙沃已革提督陳朝綱著改爲斬監候秋後處決即解刑部監禁已革副將周炳林不能聯絡列團以致貶事軍功罪戾成所部騷擾地方情節較重均著改爲發往黑龍江効力贖罪所請革職之游擊謝洲田福志參將蔣大彰守備賈文貴副將李石秀均著改爲發往軍臺効力贖罪所請以都司降調之總兵陳德朝副將黃才貴均著改爲革職所請咨革之千總李應光等十名均著斥革不准留營餘著照所議辦理該部知道此次潘鼎新酌擬懲辦失事員弁殊多輕縱軍政首在賞罰嚴明何得輕率贖徇著

傳旨申飭嗣後有統兵聚眾之責者務當一秉至公信賞必罰俾各將士踴躍用命同奏膚功○前山西巡撫鮑源深卒賜卹如例○戊辰慶裕富陞奏查接管卷內光緒十年二月初六日准戶部咨開據奉天民人徐日昌等呈稱海龍城北有餘荒一處約計一百餘萬畝東界沙河子紅旗屯西界土口子後邊南界龍海城北界小孤山草廠邊一帶民人等情願承領招民開墾以裕國課而益民生懇請行文勘丈等情具呈到部查奉天園場地畝除前經奏請清丈升科外其餘各地設立卡堆概行封禁不准流民越界私開該民人等呈稱荒地一百餘萬畝是在奏明封禁之內抑係禁外餘荒應由該將軍派委委員會同海龍城總管親往查勘秉公核擬加具印結先行專案報部以憑核辦等因咨照到奉當經前任將軍公崇綺飭派協領訥欽會同海龍城總管馬有利查明具報茲據該協領訥欽等呈稱案照園場四至全圖詳細核閱該民人徐日昌等呈領餘荒之四至西界土口子後邊南界海龍城一帶地面北界小孤山草廠邊均係奉省大園場禁地其所稱東界沙河子則係大園場與吉省交界處所惟紅旗屯地名圖內未載當即撫圖會同查勘僅查有大園場與吉林連界之腰水海東南數里許山峯之上原有浮石數塊爲柵名曰紅旗廟並無紅旗屯名目訊據該處之奉界鄉約劉萬成吉界鄉約劉東義敘稱此外並無紅旗屯地方是該民人徐日昌等報領地畝均在大園場內並非禁外餘荒理合加具會銜印結並繪圖

貼說等情呈報前來查奉省之海龍城即前之鮮園場專備捕打鮮品呈進 貢物其大園場則為肄武之地均係封禁處所自四外流民將鮮園場地畝私租種植遂有莫能禁逐之勢道光緒三年間奏明弛禁計畝升科復經旗民人等將來畢地畝陸續承領而鮮園場遂廢僅留大園場一處賴以捕鮮肄武此外並無餘荒自不容再有侵佔從前奏設海龍城時派員查勘劃清界址將大園場內流民概行遷出並責成該總管翼長等督飭弁兵按季巡查禁止私墾立法極為森嚴數年以來間有無業游民潛入界內搭蓋窩鋪者莫能偵迭經驅逐拿辦各在案該民人徐日昌等平日豈絕無見聞適竟潛行赴部將不准開墾之地捏詞請領果如所請則大園場地畝勢必又復任意領墾不惟 貢鮮均無所出又將於何處肄武所係實非淺鮮前經戶部據呈咨查時行令查明此項地畝是否在封禁之內固已見及於此奴才等伏查向來領荒之人並非墾荒之戶無不向出兵費捏名包攬有一人領至數百畝者甚有領至千餘畝者領地之價每畝僅出壓租錢一千迨其輾轉出租每畝可得錢十餘千專圖巧為漁利況藉領地交租為名實則時使園禁尤屬目無法紀現既查明徐日昌等請領荒地均在大園場界內自應不准承領並籲懇 天恩垂念肄武捕鮮均關緊要請明降 諭旨將大園場永遠封禁以杜各處奸民覬覦之心惟伊等詭計極多數年之後難保不再行赴部捏詞請領應請 飭下戶部倘嗣後再有赴部具呈請領

園場各處地畝者即將具呈之人押解來京訊明治罪以嚴禁令而護園場庶幾捕鮮肆武均不至廢墜矣 上諭慶裕等奏查明大園場地畝應行永遠封禁繪圖呈覽一摺據稱准戶部咨奉天民人徐日昌等在部呈請領種海龍城北荒地此項地畝是否禁外餘荒應即查勘報部現經查明該民人請領之地均在大園場界內自應不准承領等語園場重地關係緊要豈容率請開墾著該將軍等即將奉天大園場地畝永遠嚴行封禁嗣後如有希圖漁利赴部具呈稟請領者即著該部解交奉天訊明治罪以肅禁令嗣併發○諭軍機大臣等左宗棠奏人才屈抑可惜請旨飭查一摺據稱直隸津海關道盛宣懷前經部議降級調用關係因礦務辦理含混鋪張失實議處查礦與電皆屬因公該員將礦商股本挪入電綫股本是否實明挪移所收礦本有無虧耗如何勒限辦理請旨飭查妥議等語著李鴻章會同盛宣懷將該員經辦開礦電綫事務全案詳細查覈據實具奏原摺均著鈔給閱看○庚午諭何璟著來京另候簡用閩浙總督著楊昌溶補授未到任以前著張兆棟兼理○以吳元炳為漕運總督○曾國荃奏欽奉電寄 諭旨派營渡臺並咨會撫臣楊昌溶援閩臣均電覆欽遵辦理並於七月十三日馳奏在案嗣准楊昌溶電信援閩之勇擬撥恪靖四營臣查恪靖營之在江南省者除左宗棠營處奏調七營北上通州及山東撫臣陳士杰商擬調道員李光久所帶一營赴東助防外僅存何紹彩王紫田鍾紫雲四營自應

悉數撥歸楊昌濬帶赴閩省臣卽電飭陳提飛示何紹彩王紫田鍾紫雲遵照並電致李成謀卽於近日派兵輪船裝載送至九江湖口縣換坐民船取道南昌由建昌登陸至光澤縣再由水路順流而下直達福州又咨江西撫臣潘鼎新飭所屬備船豫備湖北提督臣程文炳所帶鄂軍六營臣亦電致署兩湖督臣卞寶第咨會程文炳欽遵前奉諭旨由江西陸路赴閩以厚楊昌濬援閩之兵力查何紹彩原紮上海鍾紫雲原紮焦山都天廟王紫田移紮揚州均屬緊要之地必須立刻撥營接防方免貽誤臣飭易致中於象山防兵內撥二營移紮焦山都天廟守護礮臺礮位其所遺象山汛地卽派劉連捷新勇二營前往駐紮何紹彩所遺上海汛地卽派陳提新勇一營駐紮王紫田所遺揚州汛地則派譚聘理所招王載駟新營接防因念恪靖四營遠道援閩亟應寬籌餉需臣已電飭上海道支應所并諭金陵防營支應局准其在於續借出使經費項下發足七月分之餉再加發八九月三箇月餉銀此恪靖四營援閩發餉坐船之大概規模也至於議定渡臺之銘武四營駐紮江陰現係張景春統領前因無船裝載不能渡臺昨接李鴻章電信稱有英商輪船尙肯裝運且由江陰登舟不著形跡并稱可載千六百人臣卽電致上海道邵友濂機器局與照瓊招商局馬建忠迅速妥僱英船或一次運送三營或分兩起載送四營總期早日到臺方可以應劉銘傳基隆之急又念銘武准勇四營交劉帥統帶赴臺亦宜寬給餉需臣又電飭

邵友濂鑾照現在於上海續借出使經費項下發濟七月分之餉另再加發八九十三箇月餉銀以慰兵勇遠行之心俾劉銘傳不至因餉掣肘惟該四營所遺江陰汛地極關緊要臣飭劉連捷親率新勇四營會同張景春實力防守此銘武四營渡臺發餉坐船之大概規模也至於左宗棠營處所調七營現守吳淞江陰等處一俟北道水勢消涸江南各統領所招新營中秋到防該七營即可於八月內啟行亦應寬給餉需臣已電飭陳湜邵友濂在於上海續借出使經費項下清撥七營八月分之餉一俟啟行北上即刻加發九十一三箇月餉銀俾得迅抵通州此恪靖七營奉調北上發餉陸行之大概規模也今早接北洋電報法船意在入江將欲全毀我水師等語囑臣速為戒備臣飛電李成謀陳湜等日夜嚴防所以不能派船裝兵出海送到天津職是故也目下張景春馬繼和共添募淮北皖勇八營劉連捷添募四營陳湜易致中吳隆海譚勢理陳美仙等共添募十營各隸各統以歸畫一張景春曹德慶各添募水雷勇一哨李成謀來營前添水勇各兵船尙不敷用臣已咨擬准其再添購據各統領兩願報稱就近招募者已有八營成軍其在遠處招募者中秋前後均可到防惟餉項十分支絀前次欽奉諭旨允許臣奏撥部餉每月五萬兩此時專盼戶部議准應請從七月分起每月撥濟餉銀五萬兩俾得發給新營乃可以支危局再欽奉電到諭旨飭周馥波速招十數營馳赴天津并允從七月起由部撥餉銀五萬兩臣已

飛咨周盛波欽遵迅速辦理又奉電到 諭旨飭令唐定奎速至江陰統領銘武全軍臣亦飛咨并派小輪船前往三河尖迎接惟唐定奎來兩病猶未痊兩足尙難行走一時未能來營是銘武四營應仍歸張景春統領以專責成而重防守又據李成謀兩稱六月間已調瓜洲鎮吳家榜移駐吳淞江陰以助水師戰守吳家榜早已到防可資得力本日欽奉電寄 諭旨飭令臣由運庫提銀三萬兩發給楊昌溶赴閩又撥一萬兩交李光久率同恪靖毅營并添募二營赴東均已照辦理合逐條陳明仰慰 聖懷 上諭軍機大臣等覽奏已悉該督籌辦各節均屬妥協該部知道○曾國荃奏 臣欽奉光緒十年七月十一日電寄 諭旨法人侵擾閩疆之礮臺兵船均不足恃前飭南北洋撥船援閩非曰恐為被搶卽曰難敵鐵艦是該大臣等明知船不足恃豈可不思變計誘敵登岸堅壁清野沿途設伏均屬要著李鴻章曾國荃迅速籌議除戰船礮臺外有何必勝之策毋得臨敵慌忙徒損精銳吳淞江陰爲江海要隘現有礮臺求必能禦敵礮急宜多伏水雷以阻來船著李鴻章趕緊選派會放水雷之人攜帶水雷數十箇迅速往南洋助防北洋需用水雷隨時飭局添造該署督務當不分畛域速赴戎機欽此仰見 聖謨廣運指授機宜跪誦再三莫名欽感竊維治軍要道運用之妙存乎一心惟一心可以應萬事而二心不可以成一事形而上者爲道此中華邦治之隆也形而下者爲器此外夷之所擅長也今以中華之大欲制外夷之變

固宜先修富國強兵之道以端其本而後用豐陸懷水之器以治其標言之不易行之尤難伏思物窮則變必化而裁之乃謂之變惟變斯通必推而行之乃謂之通此次閩省輪艇各船集於馬尾一隅不爲不多長門等處礮臺造於十數年前不爲不豫一旦遇敵猝至不分主客不顧利鈍片刻而馬尾之兵船悉焚五日而長門之礮臺不守猶謂船臺足恃其誰信之今欲舍兵船礮力而盲防守又何以禦敵於數十里之外耶別求變計實鮮良謨不若就船與臺以求變通之法必因地以制宜更審時而度勢方可措手自來勝負無常強弱無定惟視統帥所用之將與將官所用之兵人心固與不固耳未有能得人心而大敗者亦未有先失人心而能勝者同此兵力固有先用之而勝後用之而敗者同此器械亦有彼用之而敗此用之而勝者泰西各國盤踞海上全恃船堅礮利以稱雄非有異術也卽如各國堅利之器各有等差西人無歲不戰相戰動輒數年或旋戰旋罷或既罷又戰強陵弱衆暴寡狼吞各島蠶食小國固未嘗一日安靜也其習俗除商務外皆以練戰爲業而用兵之口糧獨重待能戰之酋長獨優近年冒犯中華已非一次窺我之船礮不及彼之鋒利朝發夕至電掣風馳肆意橫行藐視各口固已神人共憤怨氣沸騰矣若我現在自以爲船堅自以爲礮利既條理之未諳復堅僻而自用徒號令於中軍期先濟之有實是不知己又不知彼能無危殆請設兵船而論彼國鐵甲計厚七八寸內襯木板厚尺八寸船幫均係夾

層中可藏人卽外層被礮擊壞而裏層未穿外水不能灌入機器鍋爐巨礮皆在厚甲之中船上礮位用電纜然發一時同響又用汽機起樁轉輪勝於人力百倍此等鉅製來窺海口各省將弁亦習見而習聞之矣中華購造輪船多是木殼卽新造之小鐵甲鐵厚不及六分太厚不及寸半乃用以抵彼之兵船其碎可以立見夏間閩省屢請撥船赴援其時洋面業已阻截南北洋均未敢造次輕許此薄脆之船不足以敵堅厚之明證也又試就礮臺而論沿海沿江星羅棋布視之屹如山立寧若長城自三月蒞任巡視各礮臺卽語文武僚屬謂礮尙可用而臺則太高萬一敵船突至多一處高臺卽多一處破碎多一處之防兵卽多一處之敗局用兵之害猶豫爲大號令事權宜定於一惟一則羣下有所適從若淆於二則萬衆羣懷疑慮令與心乖者其事必廢而不舉後令與前令相謬者其軍必敗而無成最嫌亂雜無章尤忌節短勢險惟能審量地段擇要扼守厚集兵力方是敬慎不敗之道如欲到處分兵處處設守則備多力分精神不能貫注究之凡屬敵人所不甚注意之區卽爲我軍所不必防守之地臣嘗如此當時聽者羣相詫異而臣亦以已成之跡原曰承辦各員竭盡幾許心血久歷歲月用費無數銀錢乃得建此崇高之明礮礮臺急切萬難改絃更張是以未敢輕請變計今聞閩事如此當鑒前中未敢再執膠柱之私以徇庸俗之論查西人首重測量施放大礮同皆久練精熟卽極小極微之處測準而施亦無不每發必中而

況至大至顯之高礮臺乎是不啻我樹之的而任彼之中鵠也又何忍不返求諸己耶且將欲規畫於久遠必先補救於目前刻下法人毒計意在入江全毀我水師而江南現有兵輪如此之薄礮位如此之小祇宜在江內依傍陸營曲薄要隘自存一出口與法船鏖戰則危而又危矣惟有不計焦頭爛額之功專尚曲突徙薪之計斯爲上策提督李成謀李副斌防守長江浦江其矢忠誠一心報國李成謀親駐兵船日事訓練與吳家榜吳安康等約定遇警即先開礮或泊淺沙誘敵深入而肆以疲之伺隙而擊之當不至有他虞惟吳淞口高礮臺首當敵衝陳混陳鳴志湯壽銘孫傳樞已備蒲包數十萬將欲豫裝泥沙於內以柔制剛或可略爲遮蔽臨警開礮以擊敵船不至手忙脚亂近日該各統領業已遵旨嚴傳號令固結人心水陸各營自立軍令狀斷不至聞警思退且皆願捨身報國堅守營盤地基如敵用陸兵坐小船登岸則截擊包抄勿使得逞臣諭諸將皆以礮臺雖被轟碎可恕其罪惟營地有失寸土則照依軍法誅旨明正典刑各統領將官羣願同仇敵愾斷不敢畏葸不前上負國恩仰託朝廷威福各省各路皆能自立將來變計必須極力擴充版圖長策一宜不惜工費以造堅厚之兵船不在多而在精一宜不循舊式改作平地之礮臺不宜露而宜藏船則厚其衷而堅於外敵則回於下而不凸於上各就自然之本土多鋪樹木於上面不用石塊三合泥以爲高阜之臺又必疏密相間疑似相兼或三

或五以成犄角之勢上安大礮左右兩旁空處皆用蘆葦泥沙作三四丈之高堆以眩敵人之遠目礮位則宜求其極大軍火則宜求其極精祇要經費充足自可徐徐辦就凡屬拘文牽義之章程及專尚省費之說第求多而不求精皆不應循照辦理既有利器然後一心倚重知兵之員遴選能戰之將竭力防守戰有把握幸際 聖明之世 朝廷集思廣益薄海臣民必有真才崛起上宣 國威翊贊景運即以仰副我 朝億萬年自強之計是今日因船臺不足恃而思所以變計他日即可因變計而使我之船臺足以制敵而不為敵所制豈不美歟 愚見如此理合據實直陳以備 聖慈採擇至水雷與兵船礮臺相輔而行亦係制敵之一端仰蒙 諭飭北洋大臣李鴻章協助南洋水雷各軍閫之無不鼓舞 臣於十三日接李鴻章電稱大沽北塘旅順各口新設水雷每營僅數十人又分撥粵浙寶雖再撥囑 臣就滬甯機器局中選派妥設等語 臣查北洋難以撥付係屬實情南洋所存水雷早已無多前撥給曹德慶營沈雷二十箇浮雷三十箇江陰設立水雷局時加操演施放亦尙有人但不精耳 臣昨批准張景春曹德慶各增募水雷勇百名令其趕緊學習久後或有效驗堪以仰慰 聖懷 上諭軍機大臣等覽奏已悉卽著曾國荃督率各將領實力籌防嚴密布置並隨時斟酌機宜妥為辦理務期戰守確有可恃用副委任

○是月日本國使臣榎本武揚回任